

Lomu

Polo'a Kolini kumate maineno mani avona kae-malegeno nago a'mo agia Fipi'e Lomu kumate alino momamine. Yisasi'a faliteno hetino ikapinaga haitegeno Polo'a tueti fo'a (24) kafu agava maineno Lomu kea kae-malene.

Polo'a Aposolo ali'yama'amo aepa'ahe humaine.

¹ Nagaya Polo'nae Yisasi Kalaisi ali'ya kano'a maine'na Aposolo mainogeno Anumaya Koti'a muki'a vayapiti “Alu aotage kano maineka nagaila kanale mono ke'nia huhaleka hamapaiyo.” huno hunatene.

² Ani kanale mono kea Anumaya Koti'a nayona “Kamigahue.” huno hulokiya vaige'ya agai aune vaya'mo'ya huhale'ya Anumaya Kotina alu aotage auta'ma'afi kae-malenayane.

³ Ani kanale kea agai'a Nafa'nemofe humaine. Ani Nafa'nemo'a velafa maisiafe Teviti nofi vayapiti falote humaine.

⁴ Falote huteno fali-mainefiti Anumaya Koti'a tokiya'aleti aliheti-maineafe Alu Aotage Avamu'mo'a “Ma kanoa tokiya'a hanegenon Anumaya Kotina Nafa'ne'a maine. Yisasi Kalaisi'a Anumayatimo maine.”

⁵ Mainege'ya agai agima alisaga hisayafe muki'a kotega vea'mo'ya Yisasife havi'ya amakupi male'ya amametiti hu'ya agai kema ali hipo'ya hisayafe Anumaya Koti'a Yisasi ayapitila

kayone yana namiteno “Aposolo kano maiyo.” huno hunatene.

⁶ Hunatenegi muki'a kumate vea'nene tamakai'ene Lomu mainaya vea'nene Yisasi Kalaisi anaga maisayafe ago hapali-lamatene.

⁷ Anumaya Koti'a hau ayamopafi haigeno hapali-lamategetama alu aotage vea'nea Lomua mainae. Anumaya Koti'a, Nelafa'ene Yisasi Kalaisi'a, Anumayatimo'ene kayone hisaya ya'ene tamaipa falu lamahaisia ya'ene tamamisa'e.

Polo'a Lomu kumate vea'ne amakegahe humaine.

⁸ Hagote'na ma yafe tamahapaigahue. Muki'a ma mopale vea'mo'ya tamakaifena “Yisasife havi'ya amakupi male'ya amametiti humainaya vea'ne mainae.” hu'ya lamakaifena hage'na havimainoa yafena aluya hu'na lamakaifena Yisasi Kalaisi hulatenea yateti Anumaya Koti'nimotega musena nehue.

⁹ Anumaya Koti ali'yama aluana naya mukiki hu'na agai'a Nafa'nemo hulatenea yafe kanale mono kea hamanepaugeno Anumaya Koti'a nage-maineanagi'na muki'a kanafina nunamu hu'na tamakai tamakia aye'na havinegoe.

¹⁰ Notamakoafe menima tamakaitega visuafene hu'na havinegoe “Kagaika visua yafema kahainageka kana valinato.” hu'na havinegoe.

¹¹ Tamaku'amo'a tokiya'age huno maisia tokiya, Alu Aotage Avamu'mo'a tamaminegi

nago¹a tokiyaene alisayafe tamaya hisue hu¹na tamakai¹ma tamakesua yafena tusiya huno nenahaiye.

¹² Mage nehue “Yisasife havitama lamakupi maletama tamametiti nehaya yatamimo¹a nagaila naya hisige¹na nagaya ani¹a hu¹na nagupima malenoa yanimo¹a tamakaila tamaya hisie.” hu¹na nehue.

¹³ Nafu¹naganagatama ma yafe haviho nagayama Yuta vea¹ne omainaya veapina Yisasifena kanale mono kea hamapauge¹ya ali¹ya amakupi malageno alaga¹a ayeno falote humainea kavala tamakaipi “Ani¹a hisue.” hu¹na muki¹a kanalela tamakaitega ugahe nehuanagi nago¹a yamo kani¹a maleno tilege¹na o¹unoe.

¹⁴⁻¹⁵ Anumaya Koti¹a ali¹ya alige¹na muki¹a vea¹mogamina kanale hu¹ya nemaiya vea¹nene, afa vea¹nene, avoma nehapaliya vea¹nene, avoma nohapaliya vea¹nene “Yisasifena kanale mono kea hamapaiyo.” huno hunateneafene hu¹na tamakaitega, Lomu mainaya veate, me lamahapaisuafe nagu¹amo¹a he¹nelie.

Yisasina kanale mono ke¹a Anumaya Kotina tokiya¹ae.

¹⁶ Yisasi kanale mono kehena nagayea nohue. Ani kefi Anumaya Kotina kasago¹ya tokiya yama¹a hanege¹ya muki¹a ani kema havi¹ya amakupi male¹ya amametiti humainaya vea¹mogamina Anumaya Koti¹a amaku amamena aligatigahie. Yuta* anagala hagoteno

amaku amamena aligatiteno haenaga Yuta
vea'ne omainaya vea'mogamina aligatigahie.

¹⁷ Ani kemo'a mage huno tavenelie Yisasife
havi'ya amakupi male'ya amametiti humainaya
vea'mo'ya kefo yana humainayanagi Anumaya
Koti aulagafina fatago vea'ne mainae. Ani
yafena Anumaya Koti auta'mafina mage huno
humaineane

“Fatago vea'ne mainae huno humatenea
vea'mo'ya Anumaya Kotife havi'ya
amakupi male'ya amametiti humainaya
yateti mai kanale hu'ya maigahae.” hu'ya
kae-malenayane

*Muki'a vea'mo'ya Anumaya Kotina
amakave'no hutena.*

¹⁸ Muki'a vea'mo'ya Anumaya Kotina
amakave'no hutaya kava hu'ya kefo yama hayafe
kelamage kemona falaki-malenageno Anumaya
Koti'a ikapinagati haima vaiya yama'a lavenelie.

¹⁹ Anumaya Koti'a muki'a vea'mogami
amakusafinaga agaifema havisaya yana ago
amaveli-maine.

²⁰ Anumaya Koti'a ma mopama talo humalenea
kanaleti aepa heno talo humalenea yateti agaila
o'agesuna alu aotage au'ava yama'aene agola
maige maige hisuna tokiya'aene amavelige'ya
agelama hu'ya age-mainayanagi “No'agona yafe
nehane.” hu'ya hisaya kana'amia omaleneafe
Anumaya Koti'a anona'amia amamigahie.

²¹ Amakaya Anumaya Kotina agemaine'yagi
agia alisaga nehu'ya “Kanale yana tamine.”

hu'ya agaila musena hu o'ate'ya afa amaku amakesale maine'ya aneginagi haya amaku amakesamo'a hani yapi mainae.

²² Maine'ya “Kanale tagu tagesaene vea'ne mainone.” hu'ya nehayanagi aneginagi hu'ya mainae.

²³ Maine'ya agola maige maige tokiya hale yama'a hanea Anumaya Koti agia alisaga ohu'ya amakave'no hutete'ya aiyahae hu'ya faligahe humainaya vefi, namafi, kala yagafi, osifa'vefi, amamena amayateti talo hu'ya malene'ya ani yate “Anumayati maine.” hu'ya amakia alisaga humainae.

Vea'mo'ya alu'a lu'a kefo kava mai'ya humainae.

²⁴ Na'a kava mai'ya haya yafe Anumaya Koti'a amatalege'ya amaku amakesafinaga age hama'ye hu'ya havigu havagu amakesamo amavayu hige'ya kefo yama'age tokae'ya nehu'ya amakai'ami amaugafa ali haviya humainae.

²⁵ Anumaya Koti kelamage kea amakave'no hutete'ya havige'age ke nehavi'ya Anumaya Koti'ma talo humalenea yate “Anumayati maine.” hu'ya muse-kase nehu'ya amakia alisaga humainagi ani ya'yagama talo humalenea Anumaya Kotina amakave'no hutena. Muki'a yupa agola Anumaya Koti agia alisaga hisuna kano maine. Tamage.

²⁶ Anumayamona amakave'no hutaya yafe Anumaya Koti'a amatalege'ya tusi amakaye

hisifa kava hu'ya age hama'ye haya kavala humainae. A'ne'amimo'ya anau'amimo'yaene humo kavala ne'atale'ya amafalu'yaene havi kava'yaga humainae.

²⁷ Nehage'ya vemo'yaenena a'amienama humo kavala ne'amatale'ya amaipafiti atamo'a hetige'ya nago'a ve amafalu'yaene amaugafa age hama'ye hu'ya amakaye hisifa kavala humainayafe anona'amia amakai'ami amaugafale alimainae.

²⁸ “Anumaya Koti'a afa kano maineanagita agaifena ohavigahune.” hu'ya haya yateti Anumaya Koti'a amatalege'ya kefo amaku amakesa havi'ya ase ohu kavala humainae.

²⁹ Muki'a kefo yana alu kava alu kavala humainae. Moli hulite'ya nehu'ya kumai he yane. Alu vaya'mogami yate age hama'ye hu yane. Vaya'amihe hu-haviya humate yane. Alu kanomo hia kavafe age hama'ye nehaya yane. Vaya hamae'ya falimate yane. Vaya'amimo'yaene tusi ke ne'vaiya yane. Havige'age savale kavale. Vaya'amimofe “Na'a kava nehae.” hu'ya huatifi mafi nehae.

³⁰ Vaya amakia alihaviya nehae. Anumaya Kotina kame hune'atae. Veganokano hu'ya halakae halakau ke nehu'ya amakai'ami amaugafa ali'ya haite'ya amakai'ami amaki alisaga humainae. Haegafa kefo kavala ali'ya falote nehu'ya ita'afo'amimo kea hefala'negiye.

³¹ Aneginagi nehu'ya “Na'a hugahune.” hu'ya haya kea ne'atalae. Nago'amogamifena ama-

hau amayamopafina ohamaige¹ya hamauna hu no¹amatae.

³² Anumaya Koti¹a “Na¹a yama nehaya veala anona¹amia amamisuge¹ya alite¹ya agola faligahae.” huno humainea kea ani vea¹moya haviline¹yagi ani kefo yana mai¹ya nehu¹ya na¹a yama¹agelomagi kefo yama haya vea¹mogami amakia alisaga nehu¹ya kefo yama haya yafena muse hu ne¹amatae.

2

Anumaya Koti¹a kaiyekema humatesiana fatago huno humategahie.

¹ Kefo yama nehaya yafena nago¹a veafena “Lamakaya na¹a kava nehae.” hutama nehutama amakaila fako hu ne¹amatagi tamakai¹enena ani¹a kefo kavala nehageno tamakai¹enena tamakaya nehie. Tamakaya kaiyeke humataya veamogatama ani¹a kefo yana ago humainayafe kenonama hisaya kea omalene.

² Tagaya ago havimainone Anumaya Koti¹a kelamage keleti kefo yama humainaya vea¹mogamina kaiyekea fako humateteno anona¹amia alitagifeno ne¹amamie.

³ Ne¹amamianagi hana¹a tamakesa nehaviye tamakaya ani¹a kefo yana nehaya vea¹mogamife “Tamakaya na¹a kava nehae.” hutama nehutama ani kefo yana nehayanagi “Anumaya Koti¹a kaiyeke hulamateteno anona¹a alitagifeno otamigahie.” hutama nehao? A¹ao kefo yana ago humainaya anona¹a tamamigahie.

4 Ifi Anumaya Koti'a tusiya huno kayone yama'a tamamiteno aupa'a kaiyekea hu notamategi aya'ayate tamakava maime ne'uno kefo yama haya yafena anona'a aupa'a alitagifeno notamamigetama “Ani kefo yana afa ya kana yane.” hutama tamakesa nehaviyo? Havige nehagi kefo yatamihena tamaku'a aiya-hae hutama “Nago'ene ohugahune.” hutama hisayafene huno Anumaya Koti'a kayone hulamateno kaiyekema huotamatea yafena no-haviyo?

5 Kagu'amo'a tusiya huno tokiya'age humainegeka “Kefo yani'ahena nagu'a aiyahae ohugahue.” hukama nehana yafena Anumaya Koti'a kagaila haima vai negatea yana hala'ya humaleneanagino kaiyekema humatesia yupa agai'a fatago huno fako hulamateteno tamaveligahie.

6 Anumaya Koti'a muki'a vea'mo'yama humainaya yateti anona'amia alitagifeno amamigahie.

7 Nago'a vea'mo'ya “Anumaya Koti'a muse huno tagia alisaga hisigeta tokiya'aene hale yapi maisune.” hu'ya kanale kava huge huge nehaya vea'mogamina Anumaya Koti'a agola maige maige hisaya hamaimula amamigahie.

8 Amamigahanagi nago'a vea'mo'ya amakai'ami amaugafaheke'ya amakesa nehavi'ya kelamage kemoni akave omale'ya kefo yamo au'ava kava akave nemalageno Anumaya Koti'a tusiya huno haiya vaimateteno

amakata aisia yana amamigahie.

⁹ Nago'a vea'mo'ya kefo kava mai'ya huge huge nehaya yafe Anumaya Koti'a tusi kana ya'ene amaugafa amagata aisia yamo'ene amakaila alino aiso humategahie. Hagoteno Yuta vea'mogami amamiteno anileti Yuta vea'ne omainaya vea'nenena amamigahie.

¹⁰ Amamigahianagi fatago kava'ma nehaya vea'nea Anumaya Koti'a halemaineda tokiya'aene ala amakiene amaipamo'a falu hisia ya'ene amamigahie. Hagoteno Yuta vea'mogami amamiteno anileti Yuta vea omainaya vea'nenena amamigahie.

¹¹ Anumaya Koti'a muki'a veafena nagoke agu agesale maineno ne'amamie.

¹² Muki'a vea'nea kahegi kema hamaopaige'ya ohavine'ya kefo yama mai'ya humainesayana Anumaya Koti'a ani kahegi keletila kaiyekea hu o'amategahigi fako hinage'ya hanimo agu'afi agola amakata aisia no maigahae. Muki'a vea'nea kahegi kema haviline'ya kefo yama nehaya vea'nea Anumaya Koti'a agai'a kahegi keleti kaiyekea alino aye fako humategahie.

¹³ Nago'a vea'mo'ya kahegi kema havite'ya ago'ma atalenesaya veafena Anumaya Koti'a "Fatago vea'ne mainae." huno hu no'amategi kahegi kema akave nemalesaya veafe Anumaya Koti'a "Fatago vea'ne mainae." huno humategahie.

¹⁴ Yuta vea'ne omainaya vea'mo'ya Anumaya Koti kahegi kea amakaipina omaleneanagi

amakai'ami amaku amakesafima hanea kema akave malayana akave malenaya kemo'a amakai'ami amaku amakesafiti ani kahegi kea ali falote humainae.

¹⁵ Anumaya Koti'a agai'a kahegi kema amaku'afima kae-malenea kea amave-lige'ya amaku amakesamo'a nago'ma hia kanafina “Havi kava nehane.” huno kaiyekea hu ne'amateno nago'ma hia kanafina “Kanale kava nehane.” huno humaineaganino tagu'afina ago kae-malegeno haneagino tavenelie.

¹⁶ Nagaya Yisasi'ma hulatenea kanale mono kema nehua kefiti ma kea hane, ma mopama ha'no hisia yupa Anumaya Koti'a Yisasi Kalaisi avayafitila muki'a vea'mo'ya falaki'ya humaine-saya yafena kaiyekea humateteno fako humate-gahie.

Yuta vaya'mo'ya mage humainae “Kahegi kemo taya hugahie.” hu'ya havigea humainae.

¹⁷ Kagaya “Yuta kano mainoe. Mosese kahegi kea havi'na akave nemaloanagino naya hugahie.” huka kagaika'a kagi alisaga nehuka “Anumaya Koti nafa'ne mainoe.” huka nehano?

¹⁸ Kahegi kea ago huge kavelige hageka hav-ilinanafe “Anumaya Kotima nehaiya kavafena havite'na fatago au'ava yana ago havilinoa kano mainoe.” huka nehano?

¹⁹ Kagaya ma kagesa nehavine “Kahegi kemo aepa'a havilinogi aulaga asu humai kanomo visia kana aveligahue. Hani yapi mainaya veala ayevasa humategahue.” huka nehano?

20 “Kahegi kemo aepa¹a havilinoafe nago¹a kema ohavinaya vea¹mogami¹ene osi osi nafa¹neyagaene humaveli hamaveli hugahue.” huka nehano?

21 Alu vea¹nea humave-nelinanagi na¹a higeka kagaika¹ahena ave notine? “Musufa yana ohiho.” huka huhaleka veala hamanepainanagi kagaika¹a musufa yana nehano?

22 “Kumai he yana ohiho.” huka veala hamane-painanagi kagaika¹a ani kumaiya nehano? Ago falimainaya veafe “Anumayati maine.” hu¹ya amakisana ne¹vaiya yafena “Onahautafa huno onahaiye.” huka nehananagi ani vea¹mogami mono nopitila musufa yana nehano?

23 Kagia alisaga nehuka “Kahegi kea havi-mainoe.” huka nehananagi ani kea ago alitagae-mainanafe Anumaya Koti agia ali haviya nehano?

24 E, Anumaya Koti kema kae-malenaya auta¹mafina Yuta vea¹mogatihena mage hu¹ya humainayane “Tamakaitamia havi kava¹ma nehaya yatamihena Yuta vea omainaya vea¹mo¹ya tamaketel¹ya Anumaya Koti agihena kamuge hatage¹ya vai ne¹atae.” huno humaine.

Amaugafa taga nehaya yana afa ya kana humaine.

25 Kahegi kema akave malesayana Yuta vaya¹mo¹ya humainaya kava hu¹ya amakoya ano¹ya laga hu yamo¹a* tamaya hugahianagi kahegi kema alitama atagaesayana tamaugafa taga nehaya yana afa ya kana yane.

26 Amakoya ano'ya taga ohunaya vayala Yuta vea omainaya vea'mo'ya kahegi kemo akave malesayana Anumaya Koti'a ani veafena mage huno hugahie “Nagai'ni nafa'neyaga maine'ya amaugafa laga humalenaya vaya kana humainae.” huno humategahie.

27 Kahegi kea akave maletama tamaugafa laga nehagi ani kahegi kema ali ne'atagaetama nago'la vaya'mo'ya, amaugafa laga ohunaya Yuta vea omainaya vea'mo'ya, kahegi kema havi'ya akave male'ya tamakaila tamakase'ya kanale kava nehaya yamo'a “Havi kava nehae.” huno hulamategahie.

28-29 Ta'yafigae Anumaya Koti vea'nea, Yuta veala, tama vea'ne mainae? Amegati amaugafa'age taga humalenayafe Anumaya Koti veala omainagi Anumaya Kotina amaku'ama amitafa humainayafe Yuta vea'nelafa mainae. Ani veala kahegi kema akave malenayafe amakai'ami amaugafa taga ohunagi Alu Aotage Avamu'mo'la amakupi emaineno haegafa amaku amakesa amamige'ya mainae. Vea'mo'ya na'ama humainesaya vea'mogami amakia alisaga ohugahagi Anumaya Koti'a agai'age amakia alisaga hugahie.

3

Kefo yamo'a kanale kavala o'agasegahie.

1 Yuta vea'mo'ya hana'la hu'ya Yuta vea omainaya veala amakase-mainaya vea'ne

mainae? Amaugafa laga hu yamo¹a na kanale ya amamine?

² Tamage Yuta vea¹mo¹ya kanale yana kasago¹ya alimainae. Hagoteno Anumaya Koti¹a humainea kema kae-malenaya kea amayapi malene.

³ Maleneanagi nago¹a vea¹mo¹ya havi¹ya amakupi male¹ya amametiti ohunaya yateti Anumaya Koti¹a “Hulokiya vaimalenoa yana muki¹a vea¹mogamina o¹amamigahue.” huno hugahifi?

⁴ A¹ao ani¹a ohugahie. Muki¹a vea¹mo¹ya havige¹age vea¹ne mainesayana Anumaya Koti¹a tamage¹age kano maine. Anumaya Koti avopina mage hu¹ya kae-malenayane

“Anumaya Kotiga humalenana kemo¹a ‘Fatago kano mainane.’ huno hugatene. Kaiyekema hugatele¹asina amakasate¹asine.” hu¹ya kae-malenayane.

⁵ Tagaiti kefo yatimo¹ma Anumayamo fatago au¹ava kava¹ma avelisigeta na¹ane hugahune? Anumaya Koti¹a kefo kava humainona yateti anona¹a haima ne¹vaiya yama¹a lamiana “Fatago ohia kava nehie.” huta hisuno? Nani kea ohisune. Muki¹a vea¹mo¹ya nehaya ke nehue.

⁶ Fatago ohunea kavala nohie. Fatago kava¹ma ohisiana hana¹a huno ma mopale vea¹mogatina kaiyekea hulategahie?

⁷ Nagaya havigema nehua yateti Anumaya Koti kelamagemo au¹ava yana amave-lisige¹ya agima alisaga hisayana na¹a hinageno Anumaya Koti¹a

nagaifena “Kefo kava nehana kano mainane.” huno hunenate?

⁸ Na¹ama hisiana “Kanale yama falote hisia yafena kefo ya hige²tao.” huta hisuno. A¹ao, nago¹a vea¹mo¹ya havige hu¹ya nagaife “Mani kea humaine.” hu¹ya havi¹ya haviya-hunatenae. Mani kema humainaya vea¹mogamina Anumaya Koti¹a kaiyeke humateteno haima ne¹vaiya yana amamigahie.

Nagola fatago kanoa omaitafa huno omaine.

⁹ Na¹ane hisune? Tagaya Yuta vea¹mogata nago¹a veala ago amakase-mainono? A¹ao, tamage hu¹na tamahapauve tagaya muki¹a veala Yuta vea¹nene Yuta vea omainaya vea¹nene kefo kava nehuna yamo alino aikagilatene.

¹⁰ Anumaya Koti¹ auta¹mafina mage hu¹ya kae-malenayane

“Fatago kanoa omaitafa huno omaine.

¹¹ Nago kanomo¹a Anumaya Kotina aepa¹a ohavine. Nago kanomo¹a Anumaya Kotifena atia no¹aye.

¹² Ago atale¹ya kefo kavake¹ya humainaya veake¹ya mainagi nagokela fatago kanoa omaitafa huno omaine.

¹³ Amavayafitila vaya komufiti¹ma hia kava huno hi¹mana¹age nehie. Amavefu¹namo¹a havige¹age nehuno ani amavaya agu¹afinaga osifa¹vemo¹a vaya¹ma amahaege¹ya nefaliya augafa tina anifinaga hane.

¹⁴ Kamuge vai ya¹ene atu¹age ke ne¹vaiya ya¹ene amavayafina havate-mainie.

15 Amaiyaye¹ya veala hamaesage¹ya falisaya yategage¹ya age nemalae.

16 Muki¹a vea ali¹ya haviya nehu¹ya havi no maisaya yama¹age ne¹amamiye.

17 Amaipa falu hu¹ya nagoke amaku amakesale akave malesaya yafena nohamaiye.

18 Anumaya Kotifena amama¹yoa ai¹ya kolia nohae.” hu¹ya kae-malenayane.

19 Tagaya havunageno¹a Anumaya Koti kahegi kemo¹a ani kahegi kemo aiyafi mainaya vea¹mogamife humaine. Ani yafe nago kanomo¹a “Nagaya kanale hu¹na fatago kano mainoe.” huno ohisie. Na¹afenomagi muki¹a ma mopale vea¹mogata Anumaya Koti aulagafina kefo kavake¹ya nehuna vea¹ne mainonafe kaiyekea hulateno anona¹a tamigahie.

20 Anumaya Koti kema akave malenea yateti Anumaya Koti¹a nago kanomofena “Fatago kano mainane.” huno hu o¹ategahie. Kahegi kemo¹a nagoke yama¹age tavenelie. “Kefo kava nehae.” huno tavenelie.

Kalaisifema havino agupi malenesia kanomofena Anumaya Koti¹a “Fatago kano mainane.” huno hutegahie.

21 Menia Anumaya Koti aulagafina fatago vea¹ne maisuna yana ago tahapaigneta nehavune. Kahegi kema akave malenaya yateti ani yana falote ohunegi alu kateti falote humaineanagino Mosese¹ene Anumaya Koti amaune vaya¹mo¹yaene kae-malenaya kemo¹a

anima kanale ya huta fatago kava¹ma hisunafe tahapaimainae.

²² Anima fatago huta maisuna kavala ma¹a humaine, nago kanomo¹a Yisasi Kalaisi hulatenea yafe havino agupi maleno ametiti humainesia yateti Anumaya Koti¹a “Fatago kano mainane.” huno hutene. Alu kana omalene.

²³ Muki¹a vea¹mogata kefo kava¹age¹ya nehunanagita Anumaya Kotina haisia kava hisuna tokiyatia kosa he-otateneanagita ikapinaga ohaigahune.

²⁴ Ohaigahunagi kefo yatimo¹a tagaila aikagilateneanagi Yisasi Kalaisi¹a tagaila lavayu hisia miyana atalesiafene huno me faligeno Anumaya Koti¹a agai¹a kayone yama¹aleti “Fatago vea¹ne mainae.” huno hulatene.

²⁵ Tagaya kefo yama huna yafena Anumaya Koti¹a aipa haviya hulateno vea amaulagafi “Yisasiga faligane.” huno hutegenome falitegeno kolama¹amo¹a elavi-mainea yafema havita tagupi maleta tametiti hunageno Anumaya Koti¹a aigetatenome kefo yatia atalelatene. Anumaya Koti¹a nayona kefo yama humainaya veala amakata aisia yana anona¹amia aupa¹a o¹amaminegi Yisasi Kalaisina hutegenome falimainea yateti Anumaya Koti¹a agai¹a fatago kava¹ma hia yana taveli-mainae.

²⁶ Menia ma mopafi mainona kanafina agai¹a fatago kavake¹yama nehia yana tavelisiafe Yisasi¹ina hutegenome fali-mainaeafe muki¹a Yisasi¹ma hulatenea yafema havi¹ya amakupi male¹ya amametiti humainaya vea¹mo¹ya kefo kavala

humainayanagi Anumaya Koti'a "Fatago vea'ne mainae." huno hune'amate.

²⁷ Na'a humaineagi tagaiti lagima alisaga hisuna kaana hanate hane? Omaletafa huno omalene. Muki'a kahegi kema akave nemalona yateti tagia alisaga hisuno? A'ao, tagaiti kanale kava huna yateti Anumaya Koti'a "Fatago vea'ne mainae." huno huotatenegi Yisasi'a hulatenea yafe havita tagupi maleta tametiti huna yateti hunelate. Ani lagima alisaga hisuna kaana omalene.

²⁸ Tagaya mage nehune Yisasi'a hulatenea yafe havita lagupi maleta tametiti humainona yateti Anumaya Koti'a "Fatago vea'ne mainae." huno hulategahie huta nehune. Kahegi kema akave malesuna yateti hu oategahigi Yisasi'a hulatenea yafema havita tagupi malona yatetike'ya ani kea hulategahie.

²⁹ Hana'a humaine? Anumaya Koti'a Yuta vea'mogami Anumaya Kotike'ya maineo? Ifi Yuta vea omainaya vea'mogami'ene Anumaya Koti'ami maineo? A'ao, muki'a veala Yuta vea'nene Yuta vea omainaya vea'nene Anumaya Koti'a Anumaya'ami maine.

³⁰ Anumaya Koti'a nagoke agai'age maineafe Yuta vea'mo'ya Yisasi'ma hulatenea yafema havi'ya amakupi male'ya amametiti humainaya yateti Anumaya Koti'a "Fatago vea'ne mainae." huno humateno Yuta vea omainaya vea'nene Yisasi'a hulatenea yafema havi'ya amakupi male'ya amametiti humainaya yateti Anumaya Koti'a "Fatago vea'ne mainae." huno humatene.

³¹ Ani kea ago humainonafe Yisasife havita

lagupi malenona yateti “Anumaya Koti kahegi kemo'a afa ya kana ke hane.” huta nehuno? A'ao na'a ohutafa humainonagi kahegi kemona ali hetita ali lokiya ne'vaune.

4

Anumaya Koti'a Apalahamufena “Fatago kano mainane.” huno hutene.

¹ Apalahamu'a Yuta vea'mogati taginagomofena na'ane hisune?

² Apalahamu'a agai'a ali'yateti muki'a kahegi kemona akave maleneafe Anumaya Koti'a “Fatago kano mainane.” huno hile'asina Apalahamu'a agai'a agia alisaga hile'asinagi Anumaya Koti aufina na'a kavala ohune.

³ Anumaya Koti auta'mafina mage huno kaemalenayane

“Anumaya Koti'a Apalahamufena ‘Na'a hugategahue.’ huno hulokiya vai-malenea kehena ‘Lamage hanafe ani'a hunategane.’ huno agupi maleno ametiti hiafe Anumaya Koti'a mage huno hutene ‘Fatago kano mainane.’ huno huteneane.” hu'ya kaemalenayane.

⁴ Veamo'ya ali'ya ne'aliya yateti miyama alinu'yahena ani miyafena “Afa'a muse ya nelamie.” hu'ya nohagi “Ali'ya alimainona anona'a ne'alune.” hu'ya nehae.

⁵ Nago kanomo'ma “Kahegi kema muki'a kanale'ma akave malesuafe Anumaya Koti'a ‘Fatago kano mainane.’ huno hunategahie.” huno'ma ohisiana “Anumaya Koti'a agai'age

kefo kava nehia kanomofena ‘Fatago kano mainane.’ huno hutenea kanomo¹a nagaila ‘Fatago kano mainane.’ huno hunategahie.” huno ametiti humaineafe Anumaya Koti¹a anima agupi maleno ametiti humainea yana ageteno “Fatago kano mainane.” huno hune¹ate.

⁶ Yuta vea¹mogatina taginagomo¹a, Teviti¹a, mage humaine nago¹a vea¹mo¹ya kahegi kea akave omale¹ya Anumaya Kotife havi¹ya amakupi malesayana Anumaya Koti¹a amakaifena “Fatago vea¹ne mainae.” huno humatesia vea¹mo¹ya tusi¹a muse hugahae.

⁷ Teviti¹a amakaifena mage huno Anumaya Koti avopina humaineane

“Vea¹mogatama kefo kava¹ma haya kavala Anumaya Koti¹a ago aigetamateno atalelmateneafe muse hiho. Kefo yama haya kavala ago ayeha¹mi-taleneafe muse hiho.

⁸ Anumayamo¹a nago kanomo humainea kefo yafena havino o¹amino age kanitesiana ani kanomo¹a muse hugahie.” huno humaineane.

⁹ Amaugafa laga humainaya Yuta vayafeke¹ya ani musena hisae huno nehio? A¹ao, amaugafa laga ohunesaya vea¹nene ani¹a hu¹ya musena hugahae. Apalahamufe tagesa havisune. Anumaya Koti¹a Apalahamufena “Na¹a kavala hugategahue.” huno hulokiya vaimalenea kehena “Tamage hananagika ani¹a hunategane.” huno agupi maleno ametiti humainea yateti Anumaya Koti¹a “Fatago kano mainane.” huno hutene.

10 Apalahamu'a hana'a huno mainegeni Anumaya Koti'a "Fatago kano mainane." huno hutene? Agoya ano'ya laga hutegeni huteneo? A'ao, laga ohunea kanafi ani kea huteneane.

11 Hagoteni augafa laga ohuneni Anumaya Koti kea havino agupi maleni ametitia humainea yateti Anumaya Koti'a "Fatago kanoa mainane." huno'ma hutene yafema vea'mo'ya havisaya yafe augafa laga humaine. Ani yafe muki'amo'ya amaugafa laga ohune'ya Apalahamu'ma humainea kava hu'ya Anumaya Kotife havi'ya amakupi male'ya amametiti humainaya yateti "Fatago vea'ne mainae." huno humatenesia vea'mo'ya Apalahamuna aginagomo'ya mainae.

12 Mainagi nago'a vea'mo'ya amaugafa laga humainayanagi ani kavake'yama ohayana Apalahamu'ma augafa laga ohunea kanafima humainea kava hu'ya Anumaya Kotife havi'ya amakupi malenaya kava'ene humainaya vea'mogami toto'amimo maine.

Anumaya Koti'a hulokiya vaimalenea kemo'a agai'fema havi'ya amakupi malenaya veafeke humaine.

13 Anumaya Koti'a Apalahamu'ene aginagomo'enefe mage huno humaineane "Muki'a ma mopagefa kava yagaisayafe tamamigahue." huno hulokiya vaimalene. "Kahegi kemona akave maletesage'na tamamigahue." huno ohunegi "Tamakaya Anumaya Kotife havitama lamakupi malage'na

‘Fatago vea'ni mainae.’ hu'na hulamotoafe tamamigahue.” huno humaineane.

¹⁴ Kahegi kema akave nemalaya vea'mo'ya alile'asina havi'ya amakupi nemalaya yamo'a afa ya kana higeno hulokiya vai-malenea kemo'a falote ohile'asine.

¹⁵ Kahegi kemo'a Anumaya Kotina hai vaigeno anona'a nelamianagi kahegi kema omalesina “Ago ali ne'atagaune.” hu'ya ohale'asine.

¹⁶ Anumaya Koti'a hulokiya vai-malenea kemo'a kayone nehia yama'aleti falote hisiafe'ene muki'a Apalahamuna aginagomo'ya alisaya yafe'ene “Agaife havi'ya amakupi male'ya amametiti humainaya yateti aligahae.” huno humaine. Kahegi kema akave nemalaya vea'mo'yage o'aligahagi taginagomo'a, Apalahamu'ma, ametiti humainea kava hisuna vea'mogatina Apalahamu'a ne'alafa maine.

¹⁷ Mage hu'ya Apalahamufena kae-malenayane
 “Kagaya muki'a kotega vea'mogamina toto'amimoga maigane.” hu'ya kae-malenayane.

Apalahamu'a Anumaya Kotife havino agupi maleno ametiti humaineafe Anumaya Koti aula-galela tototimo maine. Anumaya Koti'a fali-mainaya veala eteno hamaimula ne'amamino falote ohunea yamofena “Falote huo.” huno higeno falote humainea kano maine.

Apalahamu'a kanale'ya huno Anumaya Kotifena havino agupi malene.

18 Apalahamu'a ani kekena havino ametitia hianagi nafa'nema atesia kana'amo'a ago ha'no humainea yafena agesa ohavinegi “Muki'a kotega vea'mogamina toto'amimoga maigane.” huno humainea kele ametiti humaine.

19 Ani kanafina Apalahamu'a vani hataleti'a (100) kafu ago ha'no hutegenoko kolamo'a ago hau higeno nafa'ne atesia tokiya'a omalegeno a'amo'enena namo a mainea yafena tole agesa ohavinegi tokiya'age huno Anumaya Kotife havino agupi maleno ametitia humaine.

20 Anumaya Koti'a “Hugategahue.” huno humainea kekena “Namisio onamisio?” huno tole agesa ohavinegi Anumaya Koti agia alisaga nehuno havino agupi maleno ametiti hia yamo'a alakefa humaine.

21 “Hugategahue huno humainea yana namigahie.” huno agesa havilama humaine.

22 Na'a humaineafe Anumaya Koti'a “Fatago kanoa mainane.” huno hutene.

23-24 “Anumaya Koti'a ‘Fatago kanoa mainane.’ huno hutene.” huno kae-malene kea agai'agefeke'yana ohunegi tagai'enefe mani kea humaineane. Tagaya “Anumaya Koti'a Yisasi Kalaisina falimainefiti alino hetitenea kano maine.” huta havita lagupi maleta tametiti hunageno “Fatago vea'nea mainae.” huno hulatene.

25 Anumaya Koti'a Yisasina kefo yatia ayeha'mi-alesiafe hutegenoko me falimaine. Faliteno tagaifena “Fatago vea'ne'ni'ae.” huno hulatenea kemona tokiya'age huno hanesiafe Anumaya Koti'a Yisasina fali-mainefitila ali

hetitene.

5

Anumaya Koti'a tagaifena "Fatago vea'ne mainae." huno hulatene.

¹ Tagaya Yisasi'a hulatenea yafema havita tagupi maleta tametiti humainonafe Anumaya Koti'a "Fatago vea'ne mainae." huno hulatene. Anumayatimo'a, Yisasi Kalaisi, ani kavala hulate-neafe Anumaya Koti tokiya hale yapi maigahune.

² Yisasi Kalaisi'a agai'a hulatenea yateti ka valilategeta Anumaya Kotina kayone yama'afi umaineta Anumaya Kotina tokiya hale yama'afi mo lokaeta maisunafe tametititia huta musena nehune.

³ Ani yafekela musena nohunagi kana yapiti tokiya vaisuna yatimo'a falote hisiafene huta kana yama va'yi hiana ani yafena muse nehune.

⁴ Tokiya vaisuna yatimo'ma hanesigeno'a Anumaya Koti'a muse hulatesia au'ava yatimo'a falote hisigeno Anumaya Koti'a tagu tamena ali-gatisiafe tametititia nehuta agava mainone.

⁵ Anumaya Koti'a Alu Aotage Avamula ago tamigeno lagupi mainegeni ani Avamuteti aluya huno hau ayamopafi nehaiya yana tamineafe tametiti hisuna yana afa ya kana ohugahigi taya hugahie.

⁶ Nayona tagayama kanale kava hisuna amukotima omalenea kanafina, Anumaya Koti'ma malenea kanafina, Kalaisi'a tagayama kefo yama nehuna vea'mogatilefene huno me falimaine.

7 Nago kanomo'a fatago kanomona aya hisuafene huno ofalile'asine. Tamage nagoke kanomo'a kayone'age kanomona aya hisuafene huno falile'asino?

8 Ohavinonagi tagaya kefo kavake'ya huta maunageno Kalaisi'a tagaifene huno me fali-mainea yateti Anumaya Koti'a tagaifena hau ayamopafi nehaya yana taveli-maine.

9 Agai'a kolama'aleti kefo yama humainona anonatia aligeno Anumaya Koti'a "Fatago vea'ne mainae." huno hulateteno nago'ene taya huno kefo yama nehuna yana Anumaya Koti'a hai vaino anonatia tamigahe hianagi Yisasi'ma fali-mainea yateti tagai anona ago alimaineafe tagu tamena aligatigahie.

10 Tagaya Anumaya Kotina kame huteta mainona kanafina agai'a nafa'nemo falimainea yateti Anumaya Koti'a "Afa'a maiho." huno ali falu hulategeta nagoke taipale maineta Anumaya Koti'ene taipamo'a falu higeta mainonageno Yisasi'a fali-mainefiti heti-mainea haimu'aene maineanagino nago'ene taya huno tagu tamena aligatigahie.

11 Nagi nago yana Anumayatimo'a, Yisasi Kalaisi'ma hulatenea yafena Anumaya Kotife aluya huta musena nehune. Yisasi Kalaisi'a ago lavaleno Anumaya Koti'ene nagopi ailokae-lategeta nagoke taipale mainone.

*Atamu'a fali yana ali falote humaineanagi
Yisasi'a haimu alisaya yana ali falote humaine.*

12 Atamu'a, nagoke kanomo, kefo yana higeno ani kefo yama humainea yamo'a ma mopafina falote hutegeno kefo yama humainea kumi'amo'a haneafe vea'ma fali yana alifalote higeno muki'a vea'mo'ya kefo yama hayafe anona'amia fali yamo'a muki'a veapina emaine.

13 Kahegi kemo'a omenegeno kefo yana haneanagino kahegi kema omalesina Anumaya Koti'a nagoke nagoke'mogati kefo yatihena ohavisine.

14 Atamu mainea kanaleti aepa he'ya veala falimainae. Falime falime u'ya Mosese mainea kanafina ani'a hu'ya muki'a falimainae. Nago'a vea'mo'ya Atamu'ma atagae-mainea kava hu'ya o'atagaenayanagi afa'a falimainae. Haenagama esia kanoa Yisasi Kalaisi amema'a kana huno Atamu'a taveli-mainae.

15 Atamu'ma humainea kefo ya'ene Anumaya Koti'a kayone hulatenea yamo'ene nago avamete ohunegi alu'a lu'a humaina'e. Tamage nagoke kanomo'a kefo yama humainea yateti muki'a veala nefaliyanagi Anumaya Koti'a tusi ya huno kayone yama'afiti nagoke kanoa, Yisasi Kalaisi'a, kanale yama hulatenea yana afa'a lamigeno tusiya huno fali yamona agaseno kasago'ya veala ali kayone humatene.

16 Anumaya Koti'a kayone hulatenea ya'ene Atamu'a kefo yama humainea anona'aenena nago avamete ohunegi alu'a lu'a humaina'e. Nagoke kanomo'a kefo kava'ma humaineafe Anumaya Koti'a muki'a vea'mogamina kaiyekea humateteno "Hanimo agu'afi agola tamakata

aisia no maigahae.” huno humateneanagi kasago'ya vea'mo'ya kasago'ya kefo yana hu-mainayanagi kayone humatenea vea'mogamina “Fatago vea'ne.” huno humatene.

¹⁷ Tamage nagoke kanomo kefo yana humainea yateti faliyamo'a falote hu-maineanagi'ya muki'a vea'mo'ya nefaliyanagi nagoke kanomo'a, Yisasi Kalaisi, hulatenea yateti kasago'ya vea'mo'ya Yisasi'a kanale ya huno kayone hulatenea yafema havi'ya amakupi malaya vea'mogamife Anumaya Koti'a “Fatago vea'ne mainae.” huno hu-matesige'ya agola maige maige hisaya hamaimula alite'ya Kalaisi'a hulatenea yateti tokiya vai'ya maigahae.

¹⁸ Na'a humaineafe nagoke kanomo kefo yana humainea yateti muki'a vea'mogamina Anumaya Koti'a kaiyekea humateteno “Hanimo agu'afi agola tamakata aisia no maigahae.” huno hulateanagi nagoke kanomo fatago kava hu-maleneafe Anumaya Koti'a agaiife havino ne'amino kasago'ya vea'mogamifena “Fatago vea'ne mainae.” huno humatenea yateti agola maige maige hisaya hamaimula ago alimainae.

¹⁹ Nago kanoa, Atamu'e, Anumaya Koti kea akave omaleafe muki'a vea'mo'ya kefo yama'agela nehaya vea'ne mainagi nagoke kanomo'a, Yisasi'a, Anumaya Koti kea akave maleneafe Anumaya Koti'a kasago'ya vea'mogamifena “Fatago vea'ne mainae.” huno humategahie.

²⁰ Hu-mategahianagi Anumaya Koti'a kahegi

kema amamiana tusiya hu'ya alitagae-mainae. Kefo yama haya yamo'a alakefa hianagi Anumaya Koti'a kayone hulatenea yamo'a ani kefo yamona agaseno tusi'a yakefa hane.

²¹ Kefo yama humainaya anona'a muki'a vea'nea nefaliyanagi kayone hulatenea yama'a tusiya huno haneafe Anumayatimo'a, Yisasi Kalaisi falimainea yateti Anumaya Koti'a kayone hulateno "Fatago vea'nea mainae." huno hulateteno agola maige maige hisuna tahaimula lamine.

6

Tagaya Kalaisi'ene ailokaeta faliteta agai'ene fali-mainopiti ago het-mainone.

¹ Tagaya na ke hugahune? Tagaya kefo yama hisunageno'a Anumaya Koti'a kayone hisuna yama'a tagaipina ala huno havatelatesie huta hisuno?

² Na kea ohutafa huta ohisune. Kefo kava nehuna yana ago ataleta falimainea augafa vea'ne mainone. Falimainaya vea'mo'ya kefo yana ohugahae.

³ Yisasi Kalaisi'ene alino tategeta aiga'maeta agai'ene falimainage'ya tima fale-latenaya kea ohavinao?

⁴ Tamage tima fale-latenaya yamo'a Yisasi Kalaisi'ene aiga'maeta agai'ene falunageno komufina hevailatogeno Nelafa'a tokiya hale yama'aleti Kalaisina komufitila alino hetitenea kava huno tagai'enena ali hetilateteno haegafa

tahaimula tamigeta ali-mainonafe kanale'ya huta haegafa au'ava yapi vaiyesune.

Tagaya Kalaisi'ene ailokaeta eteta tahaimula alita mainone.

⁵ Tagaya agai'ene aiga'maeta agayama humainea kava huta faliteta ani'a huta agai'ene aiga'maeta fali-mainefiti hetimainea kava huta hetigahune.

⁶ Tagaya havimainone kefo yamo tokiya ago fali ha'no hisiafe nayoma nehavuna atafa lagu tagesa Yisasi Kalaisi'ene aiga'maeno yafaga yosale ago fali-maineanagita tagaya kefo yamo ali'ya vea'ne nago'ene omaisune.

⁷ Fali-mainesia kanomona kefo yamo'a nago'ene atafa ohugahie. Hai falimaine.

⁸ Tagaya Kalaisi'ene aiga'maeta fali-mainesunana ani'a huta agai'ene fali-mainesupitila hetita maigahune huta tagupi havita malenone.

⁹ Tagaya ago nehavune Yisasi Kalaisi'a fali-mainefiti ago heti-mainieafe nago'ene eteno ofaligahie. Fali yamo'a tokiya'a omaletafa huno omaleneafe kava yagai o'ategahie.

¹⁰ Nagoke yupa kano'a kefo yamo tokiya hegaseno fali-mainieafe nago'ene eteno ofaligahie. Haegafa haimu alino Anumaya Kotina haiya kava hisiafe maine.

¹¹ Na'a humaineafe tamakai'enena ani lamakesa havi havi hutama maiho, "Kalaisi falimainea avamete nagaya ago fali-mainoanagino kefo yamo tokiyamo'a

nago¹ene kava huonategahie. Yisasi Kalaisi¹ene aiga¹mae¹na Anumaya Kotina haisia kava hisue.” hutama hiho.

¹² Na yafe kefo yamo¹a “Ala kavatami mainoe.” huno falisia tamaugafamo¹a “Age ha¹ye hisia kava huo.” huno kava o¹yagaisie.

¹³ Kefo kava hisaya yafena tamaiya, tamayana, tamaulaga, kefo yamote ali¹yafena tamaku¹a o¹amiho. Muki¹a Anumaya Kotina agai¹age amiho. Tamakaya falimainafiti hetimainaya vea¹ne mainagi tamaugafamo¹a muki¹a kanale au¹ava yama alisiafe Anumaya Kotina amiho.

¹⁴ Tamakaya kahegi kemo¹a tamaku tamamena aligatisiafe tamametitia nohagi “Anumaya Koti¹a kayone hulateteno ago aligati-mainie.” hutama nehae. Ani yafe kefo yamo¹a tamakaila “Na kava hiho.” huno ala kavatamia omaitafa huno omaisie.

Tagaya fatago au¹ava yamo ali¹ya vea¹ne maisune.

¹⁵ Tagaya na¹ane hugahune? Kahegi kemo akave malesune huta tametitia nohunagi Anumaya Koti¹a kayone hulatenea yafe havita tametitia nehuta kefo yana kanalelagita hisuno? Ani¹a ohutafa huta ohugahune.

¹⁶ Tamakaya ohavinao? Nago kanoma muki¹a lamaku tamakesa hakitama amitetama agai avaya ali hipo¹ya hutama maisayana ani kanomo ali¹ya vea¹a maigahae. Kefo yama hu yamo ali¹ya vea¹nema mainutamahena ani kefo yama nehaya anona¹a alitetama falitama agola Anumaya Koti¹enena omaile¹asinagi tamakaya

Anumaya Koti kea akave male yamo ali'ya vea'nema mainutamahena ani kema akave malaya anona'a alisageno Anumaya Koti'a "Fatago vea'ne mainae." huno hulamategahie.

¹⁷ Tamage nayona tamakaya kefo yamo ali'ya vea'ne mainageno Anumaya Koti kea huhalagetama havilama hutama ago akave mainae. Na'a humainayafe Anumaya Kotina musena hune'atone.

¹⁸ Kefo yamo'ma nofi hulamatenea yapitila Anumaya Koti'a ago alino kalu helamategetama fatago yamo ali'ya vea'ne mainae.

¹⁹ Kema havi yatamimo'a yaufa akavi ohuneafene hu'na vea'mogata tagu tagesafiti nehuna kea tamahanepaugi haviho hagotetama tamaiya, tamayana, muki'a yatamia "Kefo yamo ali'ya nafa'ne maiho." hutama hu-mainayanagi menia tamaiya, tamayana, muki'a yatamia fatago hisia yamo ali'yate aminutamahena Anumaya Kotina alu aotage vea'ne'a maigahae.

²⁰ Hagotetama kefo yamo ali'ya vea'ne'a mainetama fatago kavala ohisaya tamakesa havimainayane.

²¹ Kefo yamo ali'ya vea'ne mainetama ani kavala humainayafe anonatamia hana augafa kanale ya alimainae? Menia ani yafena tamakaye hisifa yama'age hanegi anona'a kanale yana o'alinae. Ago falitetama Anumaya Koti'enena omaisaya yama'age ali falote humainae.

²² Kefo yamo'ma nofi hulamatenea yapitila menia Anumaya Koti'a ago alino kalu helamateteno

“Ali'ya vea'nimogatama maiho.” huno higetama mainageno ani ali'yamo anona'a “Tamakaya alu aotage vea'ne'ni'a agola maige maige hisaya tamahaimula aligahae.” huno humaine.

²³ Kefo yamo ali'ya vea'mo'ya anona'amima alisaya yana fali yane. Faligahagi Anumaya Koti'a nagola muse yana afa'a nelamie. Anumayatimo'a Yisasi Kalaisi'ene ailokaeta mainonafe agola maige maige hisuna tahaimula ago tamine.

7

Menia yaufa tagu tagesale vaiyesuna yafe humaine.

¹ Nafu'naganagatama, kahegi kema havilama hulinaya vea'ne, tamahanepauve vea'ma ofali'ya afa'a mainaya kanafina kahegi kea akave male'ya aiya'afinaga mainagi falisayana ani kemo aiya'afinaga omaigahae. Ani yafena lamakaya havimainafi ohavinae?

² Nagola avame kea tamahapaigahugi hav-iho. Nago a'mo'a vele mainesigeno'a kahegi kemo'a neve'ene kino anatafa hulisige'ana mainesa'anageno neve'ma falisigeno'a kino'ma anatafa hulige'ana nemai'a kemo'a nago'ene atafa hulino omaigahianagi afa'a alu velela maigahie.

³ Neve'ma ofalino afa'a mainesigeno'ma alu vele visiana ani a'mofena “Kumai a mainane.” hu'ya hugahagi neve'ma ago falisigeno'a kahegi kemo'a nofi'ma kitenea yana ago kalu hemaineafe nago kanoma alisiana “Kumai he a mainane.” hu'ya ohugahae.

4 Nafu'naganagatama hagotetama kahegi kemote tamametitia humainagi Kalaisi augafaene ailokaetama Kalaisi'ene falimainayafe kahegi kemona ago ataletama Anumaya Kotite kanale au'ava ya alitama falote hisayafe alu kanomo'ene, faliteno komufiti ago eteno heti-mainea kanomo'ene, ailokaetama mainae.

5 Hagoteta tagaya atafa lagu tagesaene mainonageno kahegi kemo'a "Na'a kavala ohiho." huno higeta ageta laha'ye hisuna kefo tagu tagesa alino helafigeno muki'a taugafamo'a ani'a huno kefo yama hiafe fali yama'agela ali falote humaine.

6 Humaineaganagi meni kanafina tagaya Kalaisi'ene falunageno tatafama hulinea kahegi kea ago alino kalu hetalegeta menia haegafa lagu tagesa Alu Aotage Avamuteti Anumayamo kea akave nemalone. Nayoma hanea avopima kae-malenaya kahegi kemo akave'ma malenona augafa kavala nohune.

Kefo yamo'la veala alino haviya nelahaiye.

7 Na'ane hisune? "Kahegi kemo'a havi yane." huta hisuno? Na'a ohutafa huta ohugahune. Kahegi kemo'a kefo yama nave'otile'asina "Kefo yana nehue." hu'na ohavule'asine. Ani kemo'a "Alu kanomo yatela ageka kaha'yea ohuo." huno ohile'asina nagaya alu kanomo yatela age'na naha'yema nehua yafena nagayea ohile'asine.

8 Kahegi kemo'a kefo kavala naveligeno kefo kavala falote huno muki'a age naha'yema hua

yana nagu'afi falote nehie. Kahegi kema oma-lele'asina kefo ya'mo'a fali-mainea augufa kava hige'na kefo yafena nagayea ohule'asine.

⁹⁻¹⁰ Hagote'na kahegi kema ohavinoa kanafina afa'a mainoanagi kahegi kema falote hige'na agete'na “Kefo yana nehuafe faligahue.” hu'na humainoane. “Tamahaimu tamamigahue.” huno humainea kahegi kemo'a eteno kefo yama humainoafe nahaege'na fali-mainoe.

¹¹ Kahegi kemo'a “Na'a kavala ohuo.” huno hige'na havuanagi ani kefo yamo'a ayenavataga hige'na ani kefo yama humainoafe nahaege'na fali-mainoe.

¹² Kahegi kemo'a alu aotage ke, tusiya huno fatago humainea ke'age hane.

¹³ Haneanagi ani kanale yamo'a nagaila nahaege'na falimainofi? Na'a ohutafa huno ohunegi kefo yamo'a ani kanale keleti nagaila nahaege'na falimainoe. Kefo yamo'a fufu yate efalote hutegeni kahegi kemo'a “Tusi'a havi kefo ya hane.” huno aepa'a navelige'na agete'na “Tamage ani kefo yana ase ohu yane.” hu'na nehue.

Kefo yamo'a tagu tagesamona alino nofi hune'ate.

¹⁴ Tagaya ago nehavune Anumaya Koti'a kahegi kea ago tamineanagi nagaya mopale kanoa atafa nagu nagesaene kano mainogeno kefo yamo'a nofi hunatege'na agai ali'ya ne'alue.

15 Nagayama nehua yamo aepa'la ohavinoe. “Nenahaiya yama hisue.” hu'na hua yana nohuanagi “Onahaiya yane.” hu'na hua yama'age muki'la kanafina mai'na nehue.

16 “Onahaiye.” hu'nama hua kavala huge huge mai'na nehue “Kahegi kemo'la fatago humainea ke hane.” hu'na nehue.

17 Menia ago havilinoe nagai'ni'la ani kavala mai'na nohugi kefo yamo'la nagupi maineno ani kavala nehie.

18 Nagaya havuana atafa naipafina nago kanale yana omalege'na “Kanale kava hisua yafena nenahaiye.” hu'na nehuanagi ani kanale kavala hisua tokiya'nia omalene.

19 “Nahaiya kanale kavala hugahue.” hu'na nehuanagi ani kavala nohugi kefo yafema “Onahaiye.” hu'na nehua yama'age mai'na nehue.

20 “Onahaiyema.” hu'na hua yafema hisuana ani kavala nakai'ni'la nohugi kefo yama nagupima hanea yamo ani kavala nehie.

21 Ani'la nehige'na mani'la augafa kava'ma huana nagaya “Kanale kavake'ya hisue.” hu'na huanagi kefo yamo'la nagaipina hanega'na mai'na nehue.

22 Nagu'amo'la Anumaya Koti haiya kavafena nehaiye.

23 Nehaigeno'agi naulaga, nagesa, nayamo'la muki'la naugafamo'la kefo yama hisaya amakesa hute'ya nagupima haneno Anumaya Kotifema nehaiya nagu nagesaene tu nehu'ya naugafamona kefo yamo'ya avale'ya nofipi ha'yagi'ya atete'ya “Tagai ke havio.” hu'ya nehae.

²⁴ Avo¹neo kefo kava nehua kano mainoe. Falisua naugafale mainoanagino hana kanomo nau-gafa alino katigahie?

²⁵ Anumayati Yisasi Kalaisi¹a nagu namena ago aligati-maineafe Anumaya Kotifena aluya hu¹na musena hune¹atoe. Nagai¹ni¹a nagu nage-safiti Anumaya Kotina haiya kavala akave ne-maloanagi atafa naipamo¹a kefo yamo akave nemale.

8

Kalaisi¹a kefo yatia aline¹ataleno Alu Aotage Avamu tamine.

¹ Yisasi Kalaisi¹ene ailokaeta mainona vea¹mogata Anumaya Koti¹a nagola kaiyekea hulateno kefo yama humainona anona¹a otamigahie.

² Kefo yama hu¹na falisua yamo nofipi mainogeno Yisasi Kalaisi¹a falimainea yateti haimu hanea Alu Aotage Avamu¹mo tokiyaleti ali kalu heno natalene.

³ Kahegi kemo¹a “Fatago vea¹ne mainae.” huno hulatesia tokiya¹a atafa tagu tagesamo¹a ani kahegi kea akave malesia tokiyamo¹a omalegeno ani kahegi kemo¹a tagaila alino kanale kavala hu otategahigi Anumaya Koti¹a nafa¹ne¹a hutegeno tagaya kefo vea¹mogata mauna augafa avamete augafa kalimai kano emainegeno tagayama kefo yama humainona yateti tagata aisia yana anona-tia Yisasina amigeno alino faligeno Anumaya Koti¹a kefo yatimo tokiya¹a alitalene.

⁴ Alitalegeta menia tagaya atafa lagu tagesalela tahanepaiya kavala huta vaino'ayonagi Alu Aotage Avamu'mo tahapaiya kava huta vaiyatete nehuta kahegi kemo fatago au'ava ya huta kaana vaine'ayone.

⁵ Vea'mo'ya atafa amaku amakesale'ma vaiyayana amaugafa age hama'ye hisaya yate amakesa havi havi hu'ya ani katega ne'vayanagi nago'a vea'mo'ya Alu Aotage Avamu'mo'a "Vaiyeho." huno hia kate vaiyatetema hayana Alu Aotage Avamu'mona haiya amakesa havi havi hu'ya mainae.

⁶ Vea'mo'ya atafa amaku amakesale amaugafa age hamaha'ye hisayana faligahagi vea'mo'ya Alu Aotage Avamu'mo haisia yafema amakesa havi havi hisayana amaipamo'a falu hige'ya agola maige maige hisaya hamaimula alimainae.

⁷ Atafa amaku amakesale amaugafa age hama'ye hisaya vea'mo'ya Anumaya Kotina kame tagi'ya kaene'ate'ya Anumaya Koti kahegi kemona akave omale'ya ani kea akave malesaya tokiya'amia omaletafa huno omalene.

⁸⁻⁹ Vea'mo'ya atafa amaku amakesa akave malesayana Anumaya Kotima haiya kavala ohale'asinagi tamakaya atafa tamaku tamakesa akave nomalagi Alu Aotage Avamu'mo'a tamakupi maineafe agai kea akave nemalae. Nago'a vea'mo'ya Kalaisina Alu Aotage Avamu'mo'ma amakupinaga omainesiana Kalaisi nafa'nea omainae.

¹⁰ Kefo yama humainayafe tamaugafamo'a ago

falimainegi Kalaisi¹a tamakupi mainenageno Anumaya Koti¹a “Fatago vea¹ne mainae.” huno hulamateneafe tamaku tamamemo¹a agola maige maige huno maine.

¹¹ Anumaya Koti¹a, Yisasina fali-mainefiti ali hetitenea kanomo, Avamu¹mo¹a tamakai tamakupima mainesiana Yisasi Kalaisina fali-mainefiti ali hetitenea kanomo¹a tamakupi mainea Avamuteti manima falisaya tamaugafa ali hetilamateno tamahaimula tamamigahie.

Alu Aotage Avamu¹mo kema akave male-sunana Anumaya Koti nafa¹ne mainone.

¹² Nafu¹naganagatama Yisasi¹a hulatenea yafena anona¹a amisuna yana hane. Atafa lagu tagesamo¹a kanale yana huotateneanagino agaila amisuna anona¹a omaleanagita atafa lagu tagesa akave maleta taugafamo¹a age ha¹ye hisia kavala ohisune.

¹³ A¹ao atafa lamaku tamakesale¹ma vaiyesayana faligahagi Alu Aotage Avamu¹mo tokiyaleti tamaugafa age ha¹ye hisia yama hae falisayana agola maige maige hisaya tamahaimu¹ene maigahae.

¹⁴ Anumaya Koti Avamu¹mo kema akave male¹ya vaiyayana Anumaya Koti nafa¹neyaga mainae.

¹⁵ Alu Aotage Avamu¹mo¹a etetama koli hisaya nofipina hulamatesiafe tamakupina omenegi tamakaila “Anumaya Koti nafa¹neyaga maiho.” huno hulamatesiafe tamakupi emainegetama Anumaya Kotife “Tatao, Nelafao.” hutama nehae.

16 Nehageno Alu Aotage Avamu'mo'a agai'a "Tamakaya Anumaya Koti nafa'ne mainae." huno lagupina tahanepaiye.

17 Tahapaigeta tagaya Anumaya Koti nafa'nema mainonana Nelafa yana Kalaisi'ene tagai yatafa hapaegahie. He Kalaisi'ene kana yama alisunana ani'a huta agai'ene tokiya hale'yama'aene ala agiene aligahune.

Haenaga'a ikapinaga kanale no maisuna yana aligahune.

18 Nagaya nagesa havuana haenagama Anumaya Koti'a tokiya hale yama'a fufu yate ali falote hinageno tavelisigeta agesuna yafe tagesa haviteta "Meni kanafima tagata aiya yama ne'aluna yana afa ya kana humaine." huta hugahune.

19 Muki'a Anumaya Koti'ma talo humalenea yana agesaga hu'ya Anumaya Koti nafa'nemo'ya falote hisige'ya agesaya yafe ageke hu'ya agava mainae.

20 Muki'a Anumaya Koti talo humalenea yana kasali'ya haviya nehae. Amakaya hamaiya yateti ani kavala nohagi Anumaya Koti'a "Haenaga'a kanale yama falote hugahie." huno agai'a anima kasalisaya nofipina humatege'ya mainae.

21 Mainagi haenaga'a Anumaya Koti'a kasalino haviya hisia nofipima mainaya yana ali-talesigeta tagaya, Anumaya Koti anaga'mogatina, nofipiti tavayu hinageta ali-mainona tokiya hale yapí tagima hanea yana aligahune.

22 Tagaya ago nehavune meni kanafina muki'a Anumaya Koti talo humalenea yamo'ya amakatama aiyana a'nemo'ya nafa'nema ategahe hageno inamu yama alimatea augafa kava hu'ya hume hume hai'ya meni kanafina ne'ae.

23 Ne'agi amakai'amigela ani kavala nohagi Anumaya Koti'a tagaifena "Haenaga'a muki'a yama tamamigahue." huno hagoteno Alu Aotage Avamula ago tamigeta avale-mainonanagi ani'a huta tagupi "Avo'nio." huta kasalisia taugafa aligatisigeno haegafa taugafa falote hisigeno Anumaya Koti'a agai'a "Nafa'neyaga'ni mainae." huno hulatesiafe tametitia nehuta agava mainone.

24 Anumaya Koti'a tagu tamema aligati-mainea kanafina mage huno humaine "Tamaugafa aligatisuafe tamametiti hutama nagava maiho." huno higeta agava mainone. Nagola vea'mo'ya ago'ma alimainaya yafena agava ohugahae.

25 O'agenona yama "Aligahune." huta tametilafama hisunana tamena malelava huta agava maigahune.

26 Maigahunanagi fulu fulu vea'ne mainonafe "Na'afe Anumayamotega nunamuna huta havigesune?" huta nehunanagi Alu Aotage Avamu'mo'a "Vaeha." huno ohavunama'a kea Anumayamotega taya huno havinege.

27 Nehigeno Anumaya Koti'a vea'mogatina tagu'afima hanea yana agelama huno ne'ageno Alu Aotage Avamu'mona agu agesafima hanea ya'ene agemaine. Ani Avamu'mo'a Anumaya

Kotima haiya yafena ago haviteno Yisasi anagala amaya hugahe nunamuna huno havinege.

²⁸ Tagaya ago havimainone Anumaya Kotife hamau amayamopafi nehamaiya vea'mo'ya, Anumaya Kotina agai'ma haisia kava hisayafe ke huno agai'alega amavaleno amatenea vea'mogamite, muki'a falote hisia yana kanale ya'ene kana ya'ene Anumaya Koti'a alino kanale hune'amate.

²⁹ Anumaya Koti'a nayona ago amaketeno hapalimatenea veala agai'a nafa'nemo avamete vea'ne maisae huno amatege'ya muki'a veala mainagi Kalaisina nafa'ne'a hagoteno* ategenon "Ala nepu'amimo maisiafene." huno hutene.

³⁰ Anima hapalimatenea veafena ke huno agai'alega amateteno kefo yama'age nehaya vea'ne mainagi Yisasi humatenea yateti "Fatago vea'ne mainae." huno humateteno tokiya hale yama'a amamine.

Nago yamo'a Anumaya Kotima nehaiya yama'a tile'o'ategahie.

³¹ Na'a humaineafe tagaya na'ane huta hisune? Anumaya Koti'a tagai'ma laya hisiana ta tagaila kamea hulategahie?

³² Anumaya Koti'a "Nafa'ne'nia otamami-gahue." ohutafa huno ohunegi afa'a lagaife huno hutegenon emaineanagino muki'a yama laya hisia ya'ene tamigahie.

³³ Anumaya Koti'ma hapali-malenea vea'nea ta kaiyekea humategahie? Anumaya Koti'a agai'a "Ago fatago vea'ne mainae." huno hulatene.

³⁴ Hana kanomo kaiyekea hulateno “Tagata aisia yana aligahae.” huno hulategahie? Yisasi Kalaisi'a faliteno hetino haino Anumaya Kotina tamaga ayatega maineno taya hisia yafena Ne-fatega ke huno nunamupiti havinegeafe nago kanomo'a kaiyekea hulateno ali haviyana huotategahie.

³⁵ Kalaisi'a tagaifena tusiya huno hau ayamopafi nehaiya yama'a ta tahafalegahie? Tagaya kana yapi maisunano tusi lagata aisia yapino, vea'mo'ya havi kava'ma hulatesaya yapino, kafu kana falote hisigeno tagatesia yapino, muki'a yatima omalesia yapino, nago'a havi kava'mo tagaila alino haviya hisia yapino, tahaesageta falisuna yama falote hisia yapino? Ani ya'yaga hau ayamopafi nehaiya yana alino tahaofalegahianagino Kalaisi'a tagaifema hau ayamopafi nehaiya yama'amo'a hanege hanege huno hanegahie.

³⁶ Anima havi ya'yagama falote hisia yafena Anumaya Koti auta'mafina mage hu'ya kae-malenayane

“Kagai nafa'neyaga mainonafe muki'a yagefina tagaila tahae'ya fali ha'no nehae. Tagaya sipi sipi afu kana huta mainonage'ya tagaifena ‘Hamaesuna vea'ne mainae.’ hu'ya nehae.” hu'ya kae-malenayane.

³⁷ Muki'a mani havi ya'yagahema “Aote'yama'ae.” huta hisune. Kalaisi'a tagaifema hau ayamopafi haumainea kanomo tokiyaleti muki'a ani ya'yaga amakaseta

mainone.

³⁸ Nagaya ani yafena havilama hu'na nagupi malenoe. Anumaya Koti'a tagaifena hau ayamopafi nehaiya yana nago yamo'a tahaofalegahie. Falisunano, mainesunano, ensole vayalo, Satani Avamulo, menima hanea yano, haenagama falote hisia yano Anumaya Koti'a tagaifema hau ayamopafi nehaiya yana tahaofaletafa hugahae.

³⁹ Ikate yano mopamona afete hanea yano nago'a muki'a Anumaya Koti talo humalenea yano Anumaya Kotina hau ayamopafima nehaiya yama'a tahaofaletafa hugahae. Anumayatimo'a Yisasi Kalaisi hulatenea yateti agai'ene ailokaeta mainonafe Anumaya Koti'a lagaifena hau ayamopafi agola hauge hauge huno nehaiye.

9

Polo'a Isaleli veafe havino hau humatene.

¹ Kalaisi'ene aiga'mae'na mainoafe tamagelafa nehue. Havige nohue. Alu Aotage Avamu'mo'a nagupi mainege'na nagu'aleti tamage nehue.

² Yuta anaga'nimo'ya Yisasi kea ohaviya'yafe muki'a kanafina naipamo'a kana'age nehuno nagata ne'aiye.

³ Nagoke nofi anaga'nimo'ya amaku'a aiya-hae hu'ya Yisasi ke havisayafe Anumayamotega ke hu'na havigesugeno “Hai vainateno natale-nege'na hani yapi nagaila nenateka ani veala amavalesane.” hu'na havigesua nagesa nehavue.

4 Nagai nofi anagala Isaleli vea'nea Anumaya Kotina nafa'neyaga'a mainageno Anumaya Koti'a agai'a tokiya hale yama'a amaveliteno alino hagelafi-matenea kea humateteno kahegi kea amamino agai agima alisaga hisaya ali'yana amamino “Ma'a yama hulamategahue.” huno hulokiya vaimalenea kea hamapai-maine.

5 Ani nofipiti tokiya'age taginagomo'ya falote humainayanagino Kalaisi'a Anumaya Koti'ma tamaugafa aligatigahie huno hutenea kanoa ani taginagomo'yafiti velafa maisiafe falote humaine. Kalaisi'a muki'a yana kava yagaino Anumaya Koti maineanagita muki'a kanafina agola agia alisaga hisune. Tamage.

Anumaya Koti'a agai'a vea'ne maisaya yafe hapalimatene.

6 Anumaya Koti'ma hulokiya vaimalenea kemo'a falote huno afa ya kana nehie hu'na nehue? A'ao na kea nohugi Isaleli veafe tamage nehue muki'a ani vea'mo'ya Anumaya Kotina nafa'neyaga'a omainae.

7 Muki'a Apalahamuna aginagomo'ya nafa'neyaga'a omaitafa hu'ya omainagi nayona Anumaya Koti'a Apalahamufena mage higeno auta'mafina kae-maleneane “Kagaika nafa'nemo'a Aisaki'ma atesia nafa'neyaga kagai kaginagomo'ya maitafa hu'ya maigahae.” huno humaineane.

8 Ani kemo aepa'a mage humaine muki'a vealavemo'ya nehaya kavateti Apalahamu'ma atenea nafa'neyaga Anumaya Koti nafa'neyaga

omainagi Anumaya Koti'a hulokiya vaimalenea kele'ma amametiti humainaya veafe “Apalahamuna nafa'neyaga'a mainae.” huno humateneane.

⁹ Anima hulokiya vaimalenea kemo'a mage huno humaine “Nagayama malenoa kanamo'ma efalote hisigeno'a Sela'a ne nafa'ne ategahie.” huno humaineane.

¹⁰⁻¹² Ani yama'agefeno-magi taginagomo'a Aisaki'a ko huteno a'ama Lepekana alitenegeno aipa yama hiana kuyave nafa'nelata aipafina kanale yano havi yano hu'ana ohuna'a kanafinagino Anumaya Koti'ma humaineana agai'a haiya yateti veala hapalilatenea kava huno Anumaya Koti'a mage huno ita'animofena hapaiye “Yage nafa'nekamo'a haenaga nafa'nekamo ali'ya kano maineno akave malegahie.” huno humaineane. Ani yamofena mage huno humaine Anumaya Koti'a veala kanale kava'ma humainayafene huno ohapaligahianagino haisia kanomofe ke hinageno agaitega egahie.

¹³ Anumaya Koti auta'mafina mage huno humaineane “Yekopu'a nahau nayamopafi nahaiya kanogi Iso'a onahaiya kano maine.” huno humaineane.

¹⁴ Na'a hu-maineanagita na'ane huta hisune? “Anumaya Koti'a fatago ohia kava humaine.” huta hisuno? A'ao na'a kea ohutafa huta ohugahune.

¹⁵ Mosesefena mage huno humaineane “Nago kanoHEMA ‘Nahau hute'na kalagi aitegahue.’

hu¹nama hisua kanomona kalagila aitegahue.”
huno humaineane.

¹⁶ Na¹a humaineafe Anumaya Koti¹a kalagi aisia yana vea¹mo¹ya “Namisie namisie.” hu¹ya nehu¹ya vea¹mo¹ya “Nayamufa ai¹na ali¹ya alisuafe kalagila ainategahie.” hu¹ya hisaya yatetila kalagila aio¹amategahie. Anumaya Koti¹a “Ma kanomofe nenahaiyanagi¹na kalagi aitegahue.” huno hisia kanomona hau huno kalagila aine¹ate.

¹⁷ Anumaya Koti¹a Isipi sauve kanoa Felofe mage huno hige¹ya kae-malenayane

“Alihetigatenoa yafe muki¹a vea¹mo¹ya tokiya¹ni¹a agesaya yafe¹ene navagemo¹a muki¹a kumate ute ete hisia yafe¹ene ‘Kagaya ala kano maiyo.’ hu¹na ali hetigatenoe.” huno humaineane.

¹⁸ Anumaya Koti¹a haisia vea¹mogamina hauna humateno kalagila aimatenegi agai¹a kema ohavisaya yafe nago¹a vea¹mogamina amaku amakesa alino aililematene.

¹⁹ Nago¹amogatama nagaifena mage hutama nahavigegahae “Na¹a nehianagi na¹a higeno vea¹mogamifena ‘Havi kava nehae.’ huno nehie? Agai¹ama haisia agu agesa havisia yana ta ani yafena ‘Ohugane.’ huno hutegahie?” hutama hugahae.

²⁰ Hugahagi kagaya mopale kanomoga hana¹a augafa kano maineka Anumaya Kotifena aka huka kea vaitegane? Mopaleti aye kakalifeno talo humalenaya yopamo¹a talo hutenea kanomofena

“Na'a higeka nagaila ma'a huka talo hunate-nane?” huno hugahio?

²¹ A'ao, na'a augafa kea ohugahie. Mopaleti aye kakalifeno talo humalenesia kanomo'a talo humalenesia yana agai'a yane. Nagola mopamo alaga alino nagola kanale susufanea talo huteno ani alagaleti havi ali'yate susufanenema talo hisiana agai'a yane.

²² Anumaya Koti'a ani'a humaine. Tagaya agai'a talo humalenea susufane kana huta mainone. Nago susufane kana vea'mo'ya kefo yama humainayafe tusi hai vaimateno himamu'aleti “Amakata aisia yana amamigahue.” huno humaineanagi mailava huno amakava-maineno kaiyekea hu no'amate.

²³⁻²⁴ Amakava-mainearafe tagaya Yuta vea'mo'yaene Yuta vea omainaya vea'mo'yaene agai'alega visunafe ke hulatenea susufane kana vea'mogatihena, tusiya huno kalagila ailatenea vea'mogatina “Haenagama tokiya hale yani'a tamamisugetama aligahae.” huno hulatene. Nayona tokiya hale yama'a alisunafene huno talo hulatene.

²⁵ Ani yafena Hosea'a, Anumaya Koti aune kanomo'a Anumaya Koti humainea kea mage huno kae-maleneane
 “Yuta veapi omainaya veafena ‘Nagai'ni nofi anaga mainae.’ hu'na hugahue. Nagu'a o'amaminesua anagafena ‘Nahau nayamopafi nenahaiya anaga mainae.’ hu'na hugahue.

²⁶ Anumaya Koti'a ‘Nagai anaga omainae.’

huno humainea kumatega Anumaya
Koti'a amakaifena mage huno hugahie
‘Tamakaya nahaimu hanea Anumaya Kotinina
nafa'neyaga'ni'a mainae.’ huno hugahie.” huno
humaineane.

²⁷ Aisaiya'a Isaleli veafe mage huno kae-
maleneane

“Isaleli vea'mo'ya nafa'ne'amima ate'ya
atagufe'yama hage li kahaepa kana hu'ya
kasago'ya vea'ne maigahayanagi osi anaga
kano'a amaku amamena aligatigahue.

²⁸ Anumayamo'a ma mopale mainaya veala
kaiyekea humateteno ‘Na'a yama aligahae.’ huno
humainea kemona ani kavala fatago huno aupa
kano'a humateteno ali ha'no hugahie.” huno
humaineane.

²⁹ Aisaiya'a hagoteno mage huno humaineane
“Muki'a tokiya'a hanea Anumayamo'a osi'a
anaga kano'atihe kalagi aio'amatele'asina
muki'amogatina Sotomu mainaya
vea'nene Komola mainaya vea'nene
fali'ya fanane humainaya kava
hute'asine.” huno humaineane.

*Isaleli vea'mo'ya amametiti ohayafe fatago
veala omainae.*

³⁰ Na'a hu-maineanagita na'ane huta hisune?
Yuta veapi omainaya veala fatago vea'ne
maisayafe kasageke vokela ohunaya vea'mo'ya
afa'a Yisasi'a hulatenea yafe havi'ya amakupi
male'ya amametiti humainaya yateti Anumaya
Koti'a ani vea'mogamifena “Fatago vea'ne
mainae.” huno humatene huta hisuno?

³¹ Humateneanagi Isaleli vea'mo'ya tusiya hu'ya kahegi kemona akave malesaya yafe kasageke vokela hayanagi ani kemona akave malelama ohunaya yafe fatago vea'nea omainae huta hisuno?

³² E, ani ke hisune. Na'a hige'ya fatago veala omainae? “Tagaiti kasageke hisuna ali'yateti fatago vea'ne maigahune.” hu'ya hayanagi “Yisasi'a hulatenea yafema havita lagupi maleta tametiti humainonafe ‘Fatago vea'ne mainae.’ huno hulategahie.” hu'ya ohunayanagi'ya fatago vea'nea omainae. Yisasi'a yafa kana humaineanagi agaifena havi'ya amakupina omalenaya yafe ani haleto'na yafate ayalega amaiya aye-ka'yopeli'ya asaga hulavi-mainae.

³³ Anumayamo auta'mafina mage hu'ya kae-malenayane

“Agegeho nagola aye hataga huli'ya asaga hulavisaya yafana Saiyoni* malogeno hane. Asaga hulavigahayanagi agaifema havi'ya amakupi malenaya vea'mo'ya amakayea ohugahae.” hu'ya kae-malenayane.

10

Muki'a Isaleli vea'mo'ya Anumaya Koti au'ava yana o'agenae.

¹ Nafu'naganagatama Anumaya Koti'a Yuta vea'mogami amaku amamena aligatisiafe aluya huno nenahaige'na muki'a yupa ani yafena nunamuna nehue.

² Amakayama nehaya kavala agete'na mani kea nehue amakaya Anumaya Kotina haisia kavala aluya hu'ya hisaya amaku amakesa nehaviyanagi anima haiya yafena havilama nohu'ya ani kavala nohae.

³ Anumaya Koti'a veafema “Fatago vea'ne mainae.” huno humatenea yafena nohavi'ya “Ani kavala hulato.” hu'ya havinokagi amakai'amima maiya au'ava ya'amia “Anumaya Koti'a ageteno ‘Fatago kava nehae.’ huno hugahie.” hu'ya nehayanagi amakai'ami humainaya yafe ani kea huo'amategahie.

⁴ Huo'amategahigi Kalaisi'a hulatenea yafema havi'ya amakupi male'ya amametiti humainaya vea'mogamifena Anumaya Koti'a “Ago fatago vea'ne mainae.” huno humateteno ani yafena Kalaisi'a Mosese kahegi kemona alifatago huno ali ha'no humaineane.

⁵ Kahegi kema akave malesayana Anumaya Koti'a “Fatago vea'ne mainae huno humategahie.” huno Mosese'a mage huno kae-maleneane.

“Nago'a vea'mo'ya muki'a kahegi kema akave malesayana ani keleti vaiyegahae.” huno hu-maineane.

⁶ Hu-maineanagi nago'a vea'mo'ya Yisasi hulate-nea yafema havi'ya amakupi male'ya amametiti humainayafe Anumaya Koti'a “Fatago vea'ne mainae.” huno humatenea yamofena mage huno hie tamaku'afitila mage hutama haviokoho “Ta ikapinaga haiteno Kalaisina avaleno elavigahie?” hutama ohiho.

7 “Ta falimainaya vea¹ne nelaviya kapina Kalaisina fali-mainefiti avalegahe tavigahae” hutama havi okeho.

8 Na¹ane hie? Ani kemo¹a tamahanile haneteno tamavayale haneno tamakupi hane. Anima hu falote nehuna kea Yisasi¹ma hulatenea yafema havita lagupi maleta lametiti hisuna yafe humaine.

9 Tamakaya tamavayafiti “Yisasi¹a Anumayani¹a maine.” hutama huhaneletama tamaku¹afitila “Anumaya Koti¹a Yisasina fali-mainefiti ali hetitene.” hutama tamakupi maletama tamametiti hisageno Anumaya Koti¹a tamaku tamamena aligatihie.

10 Tagu¹afina Yisasi¹a hulatenea yafena havita tagupi maleta tametiti humainona yateti Anumaya Koti¹a “Fatago vea¹ne mainae.” huno hunelate. Tavayafiti “Yisasi¹a hulatenea yafe havi¹na nagupi malenoe.” huta hufalote nehuna yateti Anumaya Koti¹a tagu tamena alinegatie.

11 Anumaya Koti auta¹mafina mage huno humaine

“Nago¹a vea¹mo¹ya Yisasife havi¹ya amakupi male¹ya amametiti hisayana amakayea ohugahae.” huno humaineane.

12 Anumaya Koti aulagafina Yuta vea¹nene Yuta veapi omainaya vea¹nene nago avamete hu¹ya mainageno Anumaya Koti¹a muki¹a vea¹mogami Anumaya¹ami maineanagi¹ya muki¹a vea¹moya agaitega ke hisageno kanale¹ya huno amaya hisia yana kasago¹ya amamigahie.

13 Anumaya Koti auta¹mafina mage huno hu-

maineane

“Muki'a vea'mo'ya Anumayamo agi aye'ya ke hisageno'a amaku amamena aligatigahie.” huno humaineane.

¹⁴ Aligatigahianagi Yisasi'a hulatenea yafema havi'ya amakupi omalesayana hana'a hu'ya agia ayegahae? Yisasi'a hulatenea yafema ohavisayana hana'a hu'ya agaifena havi'ya amakupi male'ya amametitia hugahae? Nago kanomo'ma Yisasi'a hulatenea yafema huhaleno hamaopaisiana hana'a hu'ya ani kea havigahae?

¹⁵ Yisasi'a hulatenea yafema huhale'ya hisaya vea'ma hu o'amatesayana hana'a hu'ya ani kea huhale'ya hugahae? Anumaya Koti auta'mafina mage huno humaineane

“Yisasife kanale mono kea, tamaipa falu hutama maisaya kema, alino esia kanoa kanale kano maineanagita muse hisune.” huno humaineane.

Muki'a Isaleli vea'mo'ya Yisasi'ma hulatenea yafena havi'ya amakupina omalena.

¹⁶ Muki'a mani kema nehaviya vea'mo'ya havi'ya amakupina nomalae. Anumaya Koti auta'mafina Aisaiya'a mage huno humaineane

“Anumayamoga hana vea'mo'ya hamapauva kea havi'ya amakupi male'ya amametiti humainae?” huno havige-maineane.

¹⁷ Amakupi male'ya amametiti humainaya yamo havimainaya kefiti falote humaine. Anima havimainaya kea Kalaisife hamapaige'ya havi-mainae.

18 Nagaya ma'a hu'na tamahavi-negoe mani kanale kea ohavinao? A'ao tamagelafa hu'na tamahapauve muki'amo'ya ago havilinae. Anumaya Koti avopina mage huno humaineane

“Amake ai'yama haya kemo'a muki'a kotega ute ete huno ke'amimo'a muki'a kumate umaine.” huno humaineane.

19 Nago'ene tamahavi-negoe mani kanale kea Isaleli vea'mo'ya ohavinao? Tamage hu'ya ago havilinae. Hagoteno Mosesela Anumaya Koti'ma humainea kea mage huno humaineane

“Nagaya havigu veala, nago nofipi omainaya anagapiti amavalesugetama ani yafena tamaipa havi haviya humategahae. Nago nofi veala, kanale'ya hu'ya havisaya amaku amakesa omalenesia veala amavalesugetama ani yafena ke vaigahae.” huno humaineane.

20 Aisaiya'a tokiya'age huno Anumaya Koti'ma humainea kea mage huno humaineane

“Nago'a vea'mo'ya nagaifena natia no'ayesaya vea'mo'ya ago nagemainae. Nagaifema nago'a vea'nema hamavi-okenaya vea'mogami amaulagale ago fufute efalote huge'ya nagemainae.”

21 Isaleli vea'mogami-fena mage humaine
 “Aya'aya kanagefa nayateti 'Eho eho' hu'na kea huanagi nagai kea akave omaletama ke vaige vaige nehaya vea'mogatamae.” huno humaineane.

11

Anumaya Koti'a nago kaiyaga Isaleli veala ali kayone humatene.

¹ Tamahavigoe Anumaya Koti'a agai'a anaga'a amanati-taleneffi? Tamage na'a ohune. Nagayae-nena Isaleli kano mainoe. Nagaya Apalahamu kola maine'na Penisamini nofi kano mainoe.

² Mani anagala nayona Anumaya Koti'a ehe'ma hapali-malenea anaga'a amanati-o'atalene. Ilaya avagea Anumaya Koti avopima hanea kea ohavinao? Ilaya'a Isaleli anagafe nunamuna mage huno Anumayamotega havige-maineane.

³ “Anumayamogae vea'mo'ya kagai amaune vea'mogamina hamae'ya falimate'ya kagaife afu he'ya kae-salamana hunegataya ata halu'ya helaga'ya vaine'atalage'ya hage'na nagai'nige nagoke mainoge'ya nahaegahe tusiya hu'ya natine'ayae.” huno humaineane.

⁴ Higeno Anumaya Koti'a anona'ale'ma humainea kea havilinao? Agai avopina mage huno kae-maleneane

“Kagaikage omainanagi Seveni tauseni'a (7,000) vea'mo'ya onatalenae. Yafateti talo humalenaya Anumayamo agia Pali'e agia alisaga hu'ya amaku'a o'aminaya anaga'ni'a mainae.” huno humaineane.

⁵ Anima humainea kate meni kanaene Anumaya Koti'a agai'a kayone yama'aleti osi anaga'a agai'a vea'ne maisayafe ago hapali-malene.

⁶ Anumaya Koti'a agai'a kayone yama'aleti hapalimatenege kanale au'ava yama nehaya yateti

hapalimatele'asina agai'a kayone yama'amo'a
afa ya kana hile'asinagi agai'a kayone yama'aleti
hapalimatene.

⁷ Na'a humaineaganita na'ane hisune?
Isaleli vea'mo'ya Anumaya Koti'a “Fatago
vea'ne mainae.” huno humatesiafe kasageke
huge hugetayana o'alitafa hu'ya o'aligeno
Anumaya Koti'a osi vea kano'a hapalimatenea
veafe ani kea humatenegi nago'a vea'mo'ya
ohavisayafene huno amaku'a alino aitalako
humalene.

⁸ Anumaya Koti avopina mage huno humaineane
“Anumaya Koti'a amaku'amona alino amaukalo
kalo humateno amaulaga alino asu
humateno amakesa alino aililemateno
hige'ya kea ohavi'ya maima maima
e'ya meni kanaene ani kavake'ya hu'ya
mainae.” huno humaineane.

⁹ Teviti'a ani avopina mage huno humaineane
“Ala imule'ma maisayana Anumaya Koti'a kalifu
hanagi-malesigeno amatafa hisige'ya
vaili'ya asaga hulavi'ya havi ya'amimo
anona'amia aligahae.

¹⁰ Amaulagamo'a haniko'mako hisige'ya
o'agetafa hisae. Muki'a kana yama alimainayafe
amakave'yamo'ene agola fago-koko hu'ya
vaiyesae.” huno humaineane.

*Anumaya Koti'a Yuta veala omainaya
vayamogami amaku amamena aligatimaine.*

¹¹ Isaleli vea'mo'ya Yisasi kea amakave'no
hutenayafe vaili'ya asaga hulavi'ya agola

amako¹ya faimainao? A¹ao tamage hu¹ya na¹a ohunae. Yisasi kea amakave¹no hutenaya yateti Anumaya Koti¹a Yuta vea omainaya vea¹mogami amaku amamena aligatisige¹ya Isaleli vea¹mo¹ya agete¹ya “Tagai¹enena tagu tamena alilatisie.” hu¹ya age hama¹ye hugahae.

¹² Tamage Isaleli vea¹mo¹ya kefo kava hu¹ya ya-galaya yafe nago¹a ma mopafi vea¹mo¹ya kanale yana alimainae. Isaleli vea¹mo¹ya Yisasi kea amakave¹no hutenayafe Yuta veapi omainaya vea¹mo¹ya kanale yana alimainae. Kasago¹ya Isaleli vea¹mo¹ya ete¹ya Anumayamo kea havi¹ya akave malesayana tusi¹a kanale kanamo¹a falote humategahie.

¹³ Nagai¹fena “Yuta vea omainaya vea¹mogamite Yisasi kea huhaleka hamapaiyo.” huno hige¹na Aposolo kano mainoafe muse nehu¹na mani ali¹yana ne¹alua yafe tamakaya Yuta vea omainaya vea¹mogatama tamakaife nehue.

¹⁴ Manima nenahaiya ali¹yani¹aleti nagai¹ni¹a anagala, Isaleli anaga, nago¹a alihetimatesuge¹ya age hama¹ye hisageno Anumaya Koti¹a amaku amamena aligatisie hu¹na nehue.

¹⁵ Anumaya Koti¹a Isaleli anagala amanati-taleneafe muki¹a ma mopafi veafena mage huno humaine “Aigetamate¹na yuna helamate¹na nagoke taipa kalisune.” huno humaineanagi Anumaya Koti¹a eteno Isaleli vea¹nema amavalesiana fali-mainafiti hetiya augafa kava hugahae.

16 Hagote'ya talo haya kai hamemo atupa'a Anumaya Koti ne'amiyane muki'a tama'aenena Anumaya Koti yane. Nagi yosamo hafu'yama Anumaya Koti yama hanesiana muki'a yosa akopa'yagae-nena Anumaya Koti yane.

17 Anumaya Koti'a agai'a hoyafi hanea Olivi yosamona akopa'a aye sasaene'ataleno tamakaila Yuta vea'ne omainaya vea'mogatamina, afai Olivi yosamo akopa kana hutama mainageno tamavaleno fukiteti aye ka'maelamateteno nofi kilamategetama mainetama ani yosafiti tima'a aitama nena.

18 Ani yafe tamakaya aye sasaetalenea akopa'ahena "Afa vea'ne mainagi tagaya tamakaseta ala vea'ne mainone." hutama hu o'amateho. Tamakaya akopamogatama tima'a aitama tama yosamona amigeno nonegi hafu'yafiti tima'a aitama nena.

19 Tamakaya mage hutama nehae "Tagaya kanale vea'ne mainonafe tagai akopa'ma aye ga'mae-malesia yafena Isaleli akopala ago aye sasaetalene." hutama nehae.

20 Tamage Yisasife havi'ya amakupi omalaya yateti aye sasae-talegetama tamakaya Yisasife havitama tamakupi maletama tamametiti humainayafe aye ga'mae-malene. Tamakaila na'a humaleneafe "Ala vea'ne mainone." hutama tamaugafa alitama ohaitama koli hutama tamakupi maletama tamametiti humainaya yama atalesayafe tamama'yoa aino.

21 Anumaya Koti'a agai'a Isaleli vea'mogamina akopa-tafama'a alino asasae-taleneanagino

tamakaila ani kava¹ma hisageno¹a tamayoa okigahianagino ani kava huno tamakaila alino asasae-talegahie.

²² Ani yafe Anumaya Koti¹a kayone hulata yama¹aene kaiyeke hulateno haviyama anona¹a tamisia yama¹aene agelama hisune. Agai¹a kanale au¹ava yama¹a ne¹atalaya veala kaiyeke humateno tusiya huno havi yana anona¹a amamiyanagi tamakaila kayone hunelamate. Tamakaila kayone hulamateneafe tamametiti hisageno Anumaya Koti¹a nago¹ene kayone hulamategahigi na¹a ohisageno¹a tamakai¹enena ago alino asasae-talegahie.

²³ Nagi alino¹ma asasae-talenea Isaleli veala akopa¹yagamo¹yama ke nohavia ya¹amima atalesageno¹a Anumaya Koti¹a eteno alino aiga¹maematesia tokiya¹a hanegeno eteno amavaleno me maleno aiga¹maemategahie.

²⁴ Tamakaya Yuta vea¹ne omainaya vea¹mogatama hagotetama afai Olivi yosafiti falote humainea akopa mainageno Anumaya Koti¹a vaya¹mo¹ya nohaya kava huno tamavaleno Isaleli vea¹mogami Olivi yosale aiga¹maelamatene. Tamage mani akopa¹yagamogamina tama¹amo¹ya Isaleli vea¹mogamina amavaleno eteno hagote yosa¹amile maleno aiga¹maemategahie.

Anumaya Koti¹a muki¹a veala kayone yama¹a amaveligahe humaine.

²⁵ Muki¹a nafu¹naganagatama nagola falaki-mainea kema havilama hutetama aneginagi

ohisae hu'na tamahanepauve. Nago kaiyaga'a Isaleli anaga'mo'ya “Yisasi kea ohavigahune.” hu'ya tokiya vaimainagi ani kavala agola ohugahagi Anumaya Koti'a hapali-malenea Yuta vea omainaya vea'mogatama muki'a Anumaya Kotina tamaku'a amisageno hiya'ma hinageno'a Isaleli vea'mo'ya ete'ya Yisasi kea havigahae. Havigu tamakaitamihe “Tagaya muki'a ago havitafa huta havilinone.” hutama hisaya yafe mamona falaki-mainea ke tamahanepauve.

²⁶ Anumaya Koti'a muki'a Isaleli veala amaku amamena aligatigahie. Anumaya Koti autama-fina mage hu'ya kae-malenayane

“Yelusalemuti nagola amaku amamema aligatisia kanamo'a falote huteno vea'mogamina kefo au'ava ya'amia alitalegahie.”

²⁷ Anumaya Koti'a mage huno humaine “Mani kea amakai'ene ali'na nagokepi ali'na hage-lafi nelamatoe. Mage hu'na hugahue muki'a kefo yatamia alitalete'na ali'na hagelafilamate-gahue.” huno humaine.

²⁸ Isaleli vea'mo'ya Yisasi'a hulatenea yafena amakave'no hutenayafe Anumaya Kotina kame vea'a mainae. Ani'a humainaya yateti tamakaila Yuta vea omainaya vea'mogatamina tamaya humainegi nayona Anumaya Koti'a amakinago-mogamife hamapaimaine. Isaleli veala hapalimateno amakaifena “Nahau nayamopafi nenagea vea'ne mainae.” huno humaine.

²⁹ Tamage Anumaya Koti'a hagoteno nago'a veala hapali-maleteno “Kanale ya hulamate-

gahue.” huno huteno haenaga¹a agu agesa eteno havino aiyahae ohugahie.

³⁰ Hagotetama tamakaya Yuta vea omainaya vea¹mogatama Anumaya Kotina tamakave¹no hutenagi menia Isaleli vea¹mo¹ya ani¹a hu¹ya Anumaya Koti kea akave omalayafe Anumaya Koti¹a tamakaila kalagi ailamatene.

³¹ Tamakaila kalagi ailamatenage¹ya agesayafe menia Isaleli vea¹mo¹ya Anumaya Koti kea akave omalenaleti ete¹ya kalagi ailamategetama alimainaya yana amakai¹ene aligahae.

³² Anumaya Koti¹a muki¹a vea¹mogamina kalagi aimatesiafe hagoteno muki¹a veala agai kema akave omalaya yateti nofila humatene.

Tagaya Anumaya Koti agia alisaga hisune.

³³ Nama¹yo Anumaya Koti¹a ala agu agesaene kano maineno muki¹a yana haviline. Vea¹mo¹ya Anumaya Koti¹a “Na¹a ma¹a hugahue.” huno hisia agu agesamo aepa¹amo¹a afe yapi tavi-maineanagi¹ya ohavigahae.

³⁴ Anumaya Koti auta¹mamo¹a mage huno humaineane
 “Hana vea¹mo¹ya Anumayamo agu agesa havilinae? ‘Na¹a huo.’ huno agu agesa ta Anumaya Kotina amile¹asine?”

³⁵ Ta¹e ‘Nagaya Anumaya Kotina nago yana amisugeno Anumaya Koti¹a eteno anona¹a nami-gahie?’ huno humaine?”

³⁶ A¹ao Anumaya Koti¹a muki¹a yama talo humalenea kanogino aepa¹a maine. Muki¹a yana agai¹a haumainea yama¹age haneanagita tagaya

agola muki'a kana'aene kana'aene Anumaya
Kotina agai'age agi alisaga hisune. Tamage.

12

*Tagaya Anumaya Kotina taugafa muse ya kana
huta amisune.*

¹ Nafu'naganagatama Anumaya Koti'a
kalagi ailatea yafena havi'na tokiya'age ke
lamahanepauve. Anumaya Kotife muse
ya'amima sipi sipi he'ya aminaya kava hutama
tamahaimula hanenagetama muse yana
tamaugafa Anumaya Kotina amiho. Agaila
alu aotage vea'ne'agitama Anumaya Kotina
haisia kava hisayana fatago lamaku tamakesafiti
Anumaya Koti agia alisaga hugahae.

² Tamakaya ma mopafi vea'mo'ya nehaya au-
gafa kavala ohutama lamaku tamakesa aiyahae
hageno Anumaya Koti'a yaufa lamaku tamakesa
tamamineafe agai'ma nehaiya kavafena havil-
ama hutama havigahae. Ani kavala kanale yane.
Muki'a yamona ago agaseno kosa hetenea ya
hane.

*Anumaya Koti'a muse ya taminea yama'aleti
ali'yana alisune.*

³ Anumaya Koti'a agai'a kayone
yama'aleti ali'yama'a namineafe nagoke
nagoke'mogatamina tamahanepauve “Anumaya
Koti'a na'a yama namine.” huka haviteka
kagaika kaugafa alika ohaiyo. Anumaya
Koti'a agai'alefe havitama tamakupi
maletama tamametiti humainaya yana nagoke

nagoke¹mogatamina ala yano osi yano afa¹a tamamineafe fatago lamaku tamakesa havitetama lamakaitami fako hiho.

⁴Nagoke taugafamo¹agi alagate alagate taugafa haneno alu ali¹ya alu ali¹yana ne¹aliye.

⁵Tagaya muki¹a vea¹mogata ani kava huta Kalaisi¹ene aiga¹maeta agai augafa nagoke maineta afalu falu huta nagoke mainone.

⁶Mainonageno Anumaya Koti¹a kayone hulateno muse yatia haote haote huno agai¹a ali¹ya alisuna tokiyatia ago tamine. Nago¹a vea¹mogamina Anumaya Koti¹a avayafiti hamapai-mainea kea huhale¹ya hisaya tokiya muse huno¹ma amaminesiana Yisasife havi¹ya amakupi male¹ya amametiti humainaya ke¹age huhale¹ya hamapaisae.

⁷Nago¹a vea¹mogamima muse yama amafu-amakanagami amaya hisaya tokiyama amaminesia ali¹yana ali¹ya tokiya vaisae. Nago¹a vea¹mogamina vea¹ne humaveli hamaveli hisaya tokiyama amaminesiana ali lokiya vai¹ya humaveliho.

⁸Nago¹a vea¹mogamina vea amaku amakesa ali hetimatesaya tokiyama amaminesiana ali tokiya vai¹ya ani amaku amakesa ali hetimatesae. “Nafu¹naganagamima nago yama amamigahue.” huno humainesia tokiyama amaminesiana kasago¹ya male kosa he¹ya amamiho. Kava ali¹ya alisaya tokiyama amaminesiana amaku¹aleti ani kava ali¹yana ali¹ya maiho. Hauma huteno afu¹aganama ayama hisia tokiyama amaminesiana amaipa falu yapiti amaya hiho.

Tafu-taganagamina tamage huta tagu'a amamisuna ke humaine.

⁹ Tamafu-tamakanagamima tamaku'a amamigahena tamagelafa hutama amamiho. Kefo kavala tamakave'no hutetama kanale kava hisaya yama'age atafa hutama tokiya vaiho.

¹⁰ Tamafu-tamakanafema aluya huno tamahaisigetama tamaku'a amamiho. Nagoke nagoke'mogatama tamafu-tamakanagami amakia alisaga hutama "Hagoteho." hutama humateho.

¹¹ Muki'a kanafina ali'yage'ya ne'alisagetama kasalo kasala kea ohiho. Tamakupina Alu Aotage Avamu'mo tokiya'aleti tamakaila ali hetinagetama Anumayamo ali'yana aliho.

¹² Muse nehutama Anumayamo'ma hulatesia yafena tamametiti hutama agava maiho. Kana yama falote hisigetama hetitama tokiya vaiho. Muki'a kanafina Anumayamotega havige havige hutama maiho.

¹³ Anumaya Koti anaga'mogamima nago'a ya'amimo'ma kosa heo'amatesigetamahena amaya hiho. Natu vea'ma esagetama ali kayone hutama amateho.

¹⁴ Nago'a vea'mo'ya ali haviya hulamatesagetama "Ani veala alika kanale humato." hutama Anumaya Kotitega havigeheho. "Alihaviya humato." hutama haviiokeho.

¹⁵ Nago'a vea'mo'ya kigi yokalo hu'ya maisagetama tamakai'enena ani'a hutama maiho. Nago'a vea'mo'ya avima atesagetama tamakai'enena ani'a hutama avia ateho.

16 Tamafu-tamakanagami¹enena nagoke tamaku tamakesale maiho. “Ala vaya mainone.” hutama ohutama afa vea¹nene vaiyatete hiho. “Nagai¹nige kanale nagu nagesa hane.” hutama ohoho.

17 Nago¹a vea¹mo¹ya havi kava¹ma hulamate-sagetama anona¹a havi kavala hu o¹amateho. Muki¹a vea¹mogami amaufina kanale kavake¹ya hiho.

18 Tamakaitamia tuma hisaya yafena tamakesa ohavitafa hutama muki¹a vea¹nenena yuna hetama maiho.

19 Nahaumainea nafu¹naganagatama tamakai¹ma havi yama hulamatesaya anona¹a “Ani kavala humategahune.” hutama ohoho. Anumaya Koti¹a ani yama haya kavala agai¹a anona¹a amamisiafe maitama haleho. Anumaya Koti avopina mage hu¹ya kae-malenayane

Anumayamo¹a mage huno humaine “Havi kava¹ma humatesaya anona¹a amakata aisia yana amamisua yana nagai¹ni ali¹yane.” huno humaineane.

20 Havi yamo anona¹a o¹amamigahagi Anumaya Koti avopina mage hu¹ya kae-malenayane

Kame vayatamimogamima amakatesigetama kavala afa¹a amamiho. Tifema amakesigetama tina afa¹a amamiho. Na kava hutama ali kayonema humatesage¹ya amakaye hinage¹ya atalegahae huno humaineane.

21 Atalesanageno havigu havi yamo¹a katafa huyafenagi kanale yama¹age hugeno ani havi

yamona agaseno.

13

Tagaya Kamani vaya 'mogami amakave maleta maisune.

¹ Muki'a vea'mogatama Kamani vaya'mogami kea akave maleho. Nago Kamani kanoa agai'a falote huno omainegi muki'a Kamani ali'yana Anumaya Koti ayapiti alino falote humalege'ya yagai-mainae.

² Kamani vaya'mogami kekena “Kahaote'yakae.” hu'ya hisayana Anumaya Koti'enefe “Kahaote'yakae.” hu'ya nehae. Ani kava'ma hisaya vea'mo'ya amakai'ami amakata aisia anona'a aligahae.

³ Kanale kava nehisaya vea'mo'ya Kamani vayafena kolia ohugahagi havi kava'ma nehisaya vea'mo'ya koli hugahae. Kamani vayafe kolima ohinutama kanale kavake'ya hiho.

⁴ Kamani vaya'mo'ya tamaya hisagetama kanale'ya hutama maisayafe Anumaya Koti ali'ya vaya mainagi havi kava'ma hisayana tamahaesaya tokiya'amia haneafe koli hiho. Havi kava'ma hisaya vea'mogamina havi yana anona'a amakata aisia yama amamisayafe Anumaya Koti'a humatege'ya agai ali'yana ne'aliye.

⁵ Kamani vaya'mo'ya hamai vai yama tamisaya yafekela kolia huta amakai kea ohavisunagi tagaiti lagu'amo “Na'a hiho.” huno

hisia kavake'ya huta akave malesunafe Kamani vaya'mogami kea akave malegahune.

⁶ Kamani vaya'mo'ya Anumaya Koti ali'ya ne'ali'ya muki'a kanafina ani ali'yateke'ya kava yagai lokiya'age humainayafe tamakaya tamau-gafale takesi monea ne'atalae.

⁷ Anona'a muki'a kava vayala ne'amamitama tamaugafaleti'ma kanisole takesiene Kamani takesiene amamiho. Kava vayatamimogamina amaiya'afinaga ako hutama mainetama amakia alisaga hisaya vaya'mogamina amakia alisaga hutama maiho.

Nago'a vea'mogamina tagu'a amamitafa huta amamisune.

⁸ Nago yana tamamitage'ya “Haenaga'a tamamigahune.” hutama humainesaya yana aupa'a amamiho. Tamafu-tamakanagamina tamaku'a amamitama amaya hiho. Nago'a vea'mo'ya amafu-amakanama amaku'ama amamisayana muki'a kahegi kemona akave nemalae.

⁹ E, kahegi kemo'a mage humaine, Kumai he kavala ohuo. Veala haegeni ofalino. Mus-ufa yana ohuo. Alu kanomo ku'afenotela ageka kaha'yea ohuo huno nago'a kene humainegi muki'a kahegi kemona aepa'amo'a nagoke mage huno hane, kagaika kaugafahema kahaiya avamete muki'a vea'mogami amaugafahena kahaino huno humaineane.

¹⁰ Muki'a vea'mogami amaku'ama ne'amamiya vea'mo'ya alu vea'mogamina havi kavala huo'amategahae. Ani yafe vea'mo'ya

amaku¹ama ne¹amamiya veala muki¹a ani kahegi kemona akave nemalae.

Tagaya fatago huta kana vaiyesune.

¹¹ Menima mainona kanafima nehaya kavala ago havilinayafe tamaula faetama omaitama hetitama maisaya kanamo¹a ago falote humaine. Tagayama hagoteta Yisasife havita lagupi maleta tametiti humainona kanafina Anumaya Koti¹a tagu tamema aligatisia kanamo¹a alu¹ale haneanagino meni kanafina ago eno aupa nehie.

¹² Hanima kimainea kanamo¹a ago ha¹no hugahe nehigeno ko¹ma alino halesia kanamo¹a ago falote hugahe nehiafe muki¹a hani yapima nemaiya au¹ava yana ataleteta tuma hisuna kenatia, hale yamo au¹ava kenatia failisune.

¹³ Kama vaiyesunana fatago huta vea¹mo¹ya yagefima vaiyaya avamete huta vaiyesune. Alitalu huta havili neta hagifali kea ohatageta aneginagia ohisune. Ageta laha¹yea huta augafale maita yokalo o¹ateta moli huliteta ohisune. Alu kanomo yatela ageta laha¹yea ohuta tua ohisune.

¹⁴ Anumayatimona Yisasi Kalaisina kenatami kana hutama avaletama taugafale aiga¹maetama age lamahaye hisaya yafena tamakesa havi havi hutama omaiho.

14

Tagaya nelafugami no maiyana fako huo¹amatesune.

¹ Nago¹a tamafu-tamakana¹ya Yisasi¹a hulatenea yafena havi¹ya amakupi male¹ya

amametiti nehayanagi Anumaya Koti¹a “Ago fatago vea¹ne mainae.” huno humatenea yafena havilama ohu¹ya “Na¹a kava hisunageno Anumaya Koti¹a ‘Fatago vea¹ne mainae.’ huno huotategahie.” hu¹ya nehaya veala tamakai¹ene nagopi maisayafe amavaletama amateho. Amategahagi amakaya amakesafiti alu ke hisaya yafena kea vaitama ani keletila tua hu omateho.

² Nago¹a kafu-kagana¹a “Muki¹a kavela negahue.” huno agesa nehavianagi nago¹a kafu-kagana¹a Yisasife havino agupi maleneanagino Anumaya Koti¹a “Ago fatago kano mainane.” huno hutenea yafena havilama ohuno “Anumayamo¹a fatago kano mainane huno hunatesiafe afumo amela onegahue.” huno humaine.

³ Muki¹a kave¹ma nesia kafu-kagana¹a afuma nonesia afu-agananafena “Afa kano mainane.” huno huo¹ateno. Afumo ame¹ama nonesia afu-aganana¹a muki¹a kave¹ma nesia afu-agananafena “Na¹a kano mainane.” huno huo¹ateno. Anumaya Koti¹a ani tole kanolatana ago anavalemaine.

⁴ Kagaya taga maineka nago kanomo ali¹ya kanohena “Na¹a ali¹ya kano mainane.” huka hune¹atane? Agayama ani kanomo ali¹yate¹ma fatago huno alisiano havi ali¹ya alino maisiano agai¹a kava kano¹amo yane. Kagai yana omalene. Anumayamo¹a agai¹a ali lokiya vaitesia tokiya¹a haneafe ali lokiya vaitesigeno maigahie.

⁵ Nago¹a tamafu-tamakana¹ya ma amakesa nehaviye “Nagoke kanale¹ma mauna yamo¹a alu kanamona agase-maineanagita ani kanaleke¹ya

alitalu huta Anumayamo agia alisaga hugahune.” nehage¹ya nago¹a tamafu-tamakana¹ya “Muki¹a kanamo¹a nagoke avamete humainea kanale nemaune.” hu¹ya nehayanagi nagoke nagoke vea¹mo¹ya amakai¹ami amaku amakesa havilama hisae.

⁶ Nago tamafu-tamakana¹a agesa haviteno “Nagoke kanama mauna yamo¹a nago¹a kanamona agase-maineanagita ani kanaleke¹ya alitalu huta Anumayamo agia alisaga hugahune.” huno hisia kanomo¹a Anumaya Koti agia alisaga hisiafe ani kavala nehie. Nago tamafu-tamakana¹a “Muki¹a kavela negahue.” huno hisiana Anumayamotega nunamu huno muse hutenea yafenagino Anumayamo agia alisaga humainegi nago tamafu-tamakana¹a afumo ame¹ma monesia kanomo¹a “Anumaya Koti agia alisaga hugahue.” huno monesie. Agai¹enena Anumaya Kotitega nunamu huno muse huno havinege.

⁷ Nago kanoa haegafa huno maisiana agai¹alefeke¹ya huno omaine. Nago kanoma falisiana agai¹alefeke¹ya huno ofaline.

⁸ Tahaimu¹ma hanesigeta maisunana Anumayamo agia alisaga hisunafe mainone. Falisunana ani¹a huta Anumayamo agi alisaga hisunafe faligahune. Ani¹a humaineafe tahaimu¹ene maisunano falisunano Anumayamo anaga mainone.

⁹ Fali-mainaya veate¹ene hamaimu hanege¹ya mainaya veate¹ene Anumaya¹amimo maisiafe

Kalaisi'a faliteno eteno haimu alino heti-maine.

¹⁰ Nago'a vea'mogatama na'a higetama tamafu-tamakanagami no maiyana fako hune'amatae? Nago'a vea'mogatama na'a higetama tamafu-tamakanafena "Afa kano mainane." hutama hune'amatae? Tagaya muki'amogata Anumaya Koti'a ala kaiyekema hulatesifina hetigahune.

¹¹ Avopina mage huno kae-maleneane

Anumayamo'a mage humaine "Tamagelafa hu'na tamahanepauve muki'a vea'mo'ya nagaifena mage hu'ya hugahae 'Kagai vea'ne mainonagi kava hulato.' hu'ya hugahae. Muki'a vea'mo'ya 'Kagaya Anumaya Kotiti mainane.' hu'ya nagia alisaga hugahae." huno hige'ya kae-malenayane.

¹² Kae-malenageta tagaya ageteta havilinone muki'a nagoke nagoke'mogata nemauna au'ava yatimo aepatia Anumaya Kotina hapaigahune.

Tafu-taganagamina kefo kava hisaya augafa kavala hu o'amatesune.

¹³ Tafu-taganagamifena "Na'a nehane." huta fakoa humateta nago'ene havi tagesa havi o'amamisune. Na'a ohisunana tafu-tagana'ya tagete'ya asaga hulavi'ya kefo kava hisaya yafenagita havi kavala ohisune.

¹⁴ Anumayanimo'a Yisasi'ene ailokae'na maine'na ago havilinoe nago'a kave'mo'a oni'ya'age ohune. Nago kanomo'ma agai'a agu

agesafima “Oni'ya'age humaine.” huno havisia kave'mo'a oni'ya'age haumaine.

¹⁵ Kagaya nago'a kave'ma nenana yafena kafu-kaganana agu agesa alihaviya hutesanana kahau kayamopafi negahaiya kavala nohane. Kalaisi'a ani kafu-kaganana agu amena aligatisiafene huno fali-maineanagika nesana kavetetifene huka alihaviya huo'ato.

¹⁶ Kanale kava hisaya yafena havigu vea'mo'ya “Havi kava nehae.” hu'ya hulamateyafenagi kava yagaiho.

¹⁷ Kave'ma nene'ya tima nene'ya nehaya yamo'a Anumaya Koti'a kava yagailatesia yamona aepa'a omaleneanagi Alu Aotage Avamu'mo taminea fatago kava'ene taipa falu hisia ya'ene muse hisuna ya'ene aepa'a hane.

¹⁸ Haneafene hu'ya nago'a vea'mo'ya ani kava hu'ya Kalaisi ali'yama alisayana Anumaya Koti'a “Kanale kava haya vea'ne mainae.” huno hulamatesige'ya nago'a vea'mo'yaene “Kanale vea'ne mainae.” hu'ya hulamategahae.

¹⁹ Ani yafe tagaya nagoke tagu tagesale'ma maisuna kava'ene tafu-taganagami amaya huta tokiya'age hu'ya maisaya amaku amakesale maisaya kavala hisune.

²⁰ Tamakaya kave nesaya yafeke'ya nehutama Anumaya Koti ali'yana alihaviya ohiho. Muki'a kave neyana kanale yanagi kagaya nana kavemo'a kafu-kagana'ya asaga hulavisaya kava humatesanana tusi'a havi kava nehane.

²¹ Afua nesano havilima nesano nago'a

kava¹ma hisana yamo kafu-kaganana asaga hulavisia kava¹ma hutesanana ani¹ama hisana kavala atalo.

²² Ani yafema havika kagupi malenana yana kagaikaene Anumaya Koti¹ene tanakaitanige¹ya hanesie. Nago kanomo¹ma nago¹a nesia yafe¹ene hisia kava¹enena agai¹a agu¹amo¹a kaiyekema huo¹atesiana ani kanomo¹a muse hugahie.

²³ Muse hugahianagi nago kanomo¹ma nesia yafema tole agesa haviteno nesiana Anumaya Koti¹a “Havi kava nehane.” huno hutegahie. Ani kanomo¹a “Kanale ya nenoe.” huno agupi omaleneafe havi kava nehie. Muki¹a yana “Ma¹a kavala kanale kavale.” huta lagupi omalenona yana kefo yane.

15

Kalaisi agu agesamo¹ma humainea kavafeke¹ya akave hisune.

¹ Yisasife tamametiti huta tokiya ne¹vauna vea¹mogata amametiti ya¹amimo¹ma tokiya o¹vainea vea¹mogami kana ya¹amia “Tamakaitami aliho.” huta ohisunagi tagaya ha¹ma¹maeta alita tagaiti lagu tagesamo¹ma haisia kavala ohisune.

² Ohisunagi muki¹amogata tahaote tahaote tagaya tavate¹ma mainesaya veala amaya hisunage¹ya kanale¹ya hu¹ya Yisasife havi¹ya amakupi malenesaya ya¹amimo¹a tokiya vaisie.

³ Tagaya ago havimainone Kalaisi¹a agai¹a agu agesamo¹ma haiya kavala akave omalenea

yafena Anumaya Koti avopina agaife mage hu'ya
kae-malenayane

“Vea'mo'ya kagai'ma Anumaya Kotiga hu haviya
hunegataya kemo'a nagaila melino aiso
hunenate.” huno humaineane.

⁴ Nayoma kae-malenaya kemo'a meni kanafima
tagesa alino akalo hisiafene hu'ya kae-
malenayane. Anumayamo kema kae-malenaya
kefiti tokiya vaisuna ya'ene tagu tagesa ali heti-
latesia ya'ene haneafe tametiti yatimo'a tokiya
vailategahie.

⁵ Anumaya Koti'a veala tokiya vaisaya ya'ene
amaku amakesa ali hetimatesia ya'ene
aepa'agino tamaya hisigetama Yisasi Kalaisi
humainea au'ava yana akave maletafa hutama
nagoke tamaku tamakesale maisae hu'na
Anumayamotega havinegoe.

⁶ Na'a hisayafe nagoke tamaipale maitama
nagokete tamaku'a maletama Anumayatimona
Yisasi Kalaisina Nefana Anumaya Koti agia
alisaga hisae.

*Kalaisi'a Isaleli vea'nene Isaleli vea omainaya
vea'nene amaya humane.*

⁷ Vea'mo'ya Anumaya Koti agima alisaga
hisayafe Kalaisi'a tamakaila ali falu fala
hulamateno tamavale-mainea kava hutama
tamafu-tamakanagamina ali falu fala
humatetama amavaletama nagoke tamaipale
maiho.

⁸ Tamahapauve Anumaya Koti'a Yuta
vea'mogati taginagomogamife hamapai-mainea
kemo'a falote huno fatago hinage'ya “Anumaya

Koti'a tamage'age kano maine.” hu'ya hisayafene huno Kalaisi'a Yuta vea'mogamina amaya humaine.

⁹ Amaya hige'ya Yuta vea omainaya anaga'mo'ya Anumaya Koti'a kayone hulamatenea yafe agia alisaga hisaya yafena Anumaya Koti avopina mage hu'ya kae-malenayane

“Na'a hisige'na Yuta vea'ne omainaya veapina kagia alisaga hu'na musena hugategahue. Mono yagamefiti'ene kagia alisaga hugahue.” huno humaineane.

¹⁰ Ani'a huno nago kemo'a ma'a humaine

“Tamakaya Yuta vea omainaya anaga'mogatama agai'a nofi anaga'aene ailalupetama muse hiho.” huno humaineane.

¹¹ Ani'a huno nago kemo'a mage humaineane

“Tamakaya Yuta vea omainaya anagala Anumaya Kotina agia alisaga nehige'ya muki'a vea'mo'ya ani'a hu'ya agia alisaga hiho.” huno humaineane.

¹² Ani'a huno nago kea Aisaiya'a Anumaya Koti aune kanomo'a mage humaineane

“Yesi anagapiti aginagomo'a falote huno Yuta vea omainaya vea'mogatamina kava yagalimatesigetama agaifena 'Tagu tamena aligatihie.' hutama tamametiti hugahae.” huno Aisaiya'a humaineane.

¹³ Anumaya Koti'a tametiti yatimo aepa'agino agaifema tamakupi malenaya yateti tusi'a muse ya'ene tamaipa falu hisia ya'ene tamamino havatelamatesigetama Alu Aotage Avamu'mo

tokiyaleti tusiya hutama Yisasi¹ma hulamatenea yafena tamametiti hisae hu¹na nunamuna nehue.

Polo¹a Yisasi kema hamapai-mainea yafena agai¹a tusi¹a muse humaine.

¹⁴ Nafu¹naganagatama nagai¹ni¹a nametiti huana tamakaya kanale au¹ava yana kasago¹ya nehae. Muki¹a ke havi yana tamakesaene vea¹ne mainae. Tamakaitami o¹aya a¹aya hutama hamapaisayana kanale amaku amakesa tamafu-tamakanagamina amamigahae.

¹⁵⁻¹⁶ Amamigahagi Anumaya Koti¹a kayone yama¹a namiteno Yuta vea omainaya vea¹mogami amu¹nopi Yisasi Kalaisi ali¹ya alisanafene huno hunateneafene hu¹na nago¹a kema kaemaloo kemo¹a tamaku tamakesa ali¹na hao hu¹na ali hagalo hugahe tokiya vai¹na negaove. Afa¹a nokaogi mono note kava vava kana hu¹na maine¹na Anumaya Koti¹a hulatenea kanale mono kea huhale¹na hisuge¹ya Yuta vea omainaya anaga¹mo¹ya ali¹ya amakupi malesageno Alu Aotage Avamu¹mo¹a “Alu aotage vea¹ne mainae.” huno humatesige¹na amavalesuge¹ya Anumayamo avate esage¹na amisugeno Anumaya Koti¹a musena hugahie.

¹⁷ Na¹a hisige¹na nagaya Yisasi Kalaisi¹ene ailokae¹na maine¹na Anumaya Koti ali¹yama ne¹alua yafena tusi¹a muse nehue.

¹⁸⁻¹⁹ Kea nagoke yafeke hu¹na falote nehue. Yuta vea omainaya vea¹ma Anumaya Koti kema akave malesayafe Kalaisina agai¹a tokiyaleti

nehue. Nagai'ni kanale au'ava yateti'ene humainoa keleti'ene tokiya avame'yama hua ya'ene Alu Aotage Avamu'mo tokiyaleti'ene hamanepauve. Yisasi'ma hulatenea yafema kanale mono kema hulama hu'na hamapauvana Yelusalemuti aepa he'na muki'a kotega ute ete hu'na Ililikumua uva'yi humainoe.

²⁰ Nago'a mopalega Kalaisi agima ohavinaya haigilega ani ali'yana ali'na Kalaisi'ma hulatenea yafena kanale mono kea hamapaisua yafeke'ya nenahaiye. Havigu alu kanomo hagoteno Yisasi kea hamapaiteno ani kanomo'a posi ayemalenesia yosale no mo kisua yafena nonahaiye.

²¹ Anumaya Koti avopi kae-malenaya kate hugahe nehue. Mage hu'ya kae-malenayane “Agai avagema ohavinesaya vea'mo'ya agegahae. Ke'ama ohavinesaya vea'mo'ya aepa'a havigahae.” huno humaineane.

Polo'a “Lomu vea'ne tamakete'na Sipeni ugahue.” huno humaine.

²² Muki'a kanafina Lomu mainaya vea'mogatamalega ugahe huanagi visua kana ani ali'yamo tilege'na o'unoe.

²³⁻²⁴ O'unogi meni kanafina malega hanea ali'yani'a alivaya ayoanagi'na aya'aya kafugefa lamakaitega visue hu'na nagesa havi havi humainoafe menia Sipeni visua katelagi'na osi kanalega tamakai'enena mo fae'na hu falu fala hulamatete'na muse hu'na mainesugetama naya hisage'na Sipenia ugahue.

25 Tamakaitega ugahuanagi hagote¹na Yisasina amaku¹a aminaya vea¹ne amaya hisuafe Yelusalemu ne¹ue.

26 Nago¹a ya¹amima omalenea veala Yelusalemu maine¹ya Yisasife havi¹ya amaku¹a aminaya vea¹mogamifena Masetonia vealagi Akaiya vealagi amakesa havite¹ya muse hu¹ya monea amamigahe nehayanagi¹na ali¹na momamigahue.

27 Hagoteno Yuta veala Anumaya Koti¹a amaku amamema aligati-mainea kanale mono kema Yuta vea omainaya vea¹ma hamapaimainaya yate ani vea¹mo¹ya anona¹amia haneanagi¹ya amaipamo¹a kanale¹ya hige¹ya “Amamigahune.” hu¹ya Yuta veala amaugafale yana kanale humatesia yama amamisayana kanale yane.

28 Ani monea alitalu hu¹ya namisage¹na ali¹na Yelusalemu muki¹a monea momamite¹na tamakaya mainalega ute¹na Sipenia ugahue.

29 Tamakaitegama uva¹yi hisuana ago havuana Kalaisina kanale manu¹amo¹a havatenateneanagi¹na tamakaitega egahue.

30 Muki¹a nafu¹naganagatama musetami nehugi Anumayatimo¹a Yisasi Kalaisi hulatenea yafe¹ene Avamu¹mo¹ma tahau tayamopafi nelahaiya yama taminea yafe¹ene lamahavinogoe tokiya vaitama nagaifena ke hutama Anumayamotega havigegenogona nagaila naya hino.

31 Mage hutama nunamuna hiho “Yutia mainaya vea¹mo¹ya Yisasi kea nohaviya vealagi¹ya Polona atafa hu¹ya ali haviya hutegahe nehagi kagaya Anumaya Kotiga

augafa aligatio. Yelusalemu maine¹ya Yisasina amaku¹a aminaya veala Polo¹a amaya hisige¹ya ma ma hama¹maesia ali¹yama ne¹alia yafena hamaisige¹ya musena hisae.” hutama havigeho.

³² Na¹a hutama havigesageno¹a Anumaya Koti¹a hainagenofena lamakaitega eva¹yi hu¹na muse hu¹na tamakayaenena maifalu hugahue.

³³ Anumaya Koti¹a taipamo¹ma falu hisia yamona aepa¹agino tamakai¹ene muki¹amogatamaene maisie hu¹na nehue. Tamage.

16

Polo¹a muki¹a vea¹mogamina “Felugae.” huno hu falu humatene.

¹ Fipi¹a tusi¹a kanale¹ya huno Yisasina agu¹a aminea tasatimo¹e, Senikalia maine¹ya Yisasina amaku¹a aminaya vea¹mogamina kanale¹ya huno amaya humaine.

² Anumayatimo¹ene ailokaetama mainayafe Fipina avaletama amu¹notamifi atesageno maisie. Anumaya Koti nafa¹nemogatama na¹a hisunana kanale yane. Nagi nago¹a yamo¹ma kanama haisigetama kanale¹ya hutama aya hiho. Fipi¹a ani¹a huno hagoteno¹a nagayaene kasago¹ya vea¹nene taya humaineane.

³ Yisasi Kalaisi ali¹yama naha¹mae¹ana ne¹ali¹a alavelafena Palisilagani Akuvilaganina hutama falu fala hunateho.

⁴ “Kagai¹ma kahaesageta¹a faligahune.” hu¹ana humaina¹afe nagayake musena

huno¹anatogi muki¹a Yuta vava omainaya Yisasi anaga¹mo¹yaene hu¹ya musena hune¹anatae.

⁵ Anakai nopima Yisasi kema havigahe melitaluma nehaya vea¹nene nagaila hu falu fala ke¹nia humateho. Epainetasina, Esia kotega mainaya vea¹mogamina hagoteno amakaseno Kalaisi kea havino agupi malenea kanoa maineanagino nahau nayamopafi nenagea nenafuna nagaila hu falu fala ke¹nia huteho.

⁶ Ani¹a hutama Malia¹a, tamakai¹enema maineno¹a tamaya hugahena tusi ali¹ya ali-mainea alagi hutama falu fala huteho.

⁷ Atalonikusigani Yuniasiganina ani¹a hutama nagaila hu falu fala ke¹nia hunateho. Nagaya Yisasi kema ohavinoa kanafina ani kanolatana Yisasife havi¹ana anakupi malet¹ana Aposolo vava¹mogami amu¹no¹amifi anaki hanea kanolata maine¹ana nagai¹ene Yuta nofi vava mainonanagita nagai¹ene Yisasi kema humainona yateti nofila hulatenayane.

⁸ Ampiliatusina Anumayamo¹ene ailokaeya¹age¹na nagu¹a aminoa nenafu¹agi nagaila hu falu fala ke¹nia huteho.

⁹ Tamakaya Upanusi¹a Anumayamo ali¹yana tokaeta¹a ne¹alu¹a kanoene Setakisina kanale¹ya hu¹na nagu¹a aminoa nenafu¹ene nagaila hutama falu fala ke¹nia hune¹anatetama hiho.

¹⁰ Apelesi¹a Kalaisina akave¹ma nemaliafe agia hanegi nagaila hu falu fala ke¹nia huteho. Alisitopulusi afamo¹mogamina nagaila hu falu fala ke¹nia humateho.

11 Helotioni'a nagai nofi vayalagi nagaila hu falu fala ke'nia huteho. Anumayamo'ene ailokae'ya mainaya tafu-taganagamina Nasisusi afamo'mogamina nagaila hu falu fala ke'nia humateho.

12 Talifinagani Talifosagania Anumayatimo ali'ya tusiya hu'ana ne'ali'a kanolatanagi nagaila hu falu fala ke'nia hunateho. Pesi'si'a nahau nayamopafi nenagea alagi Anumayatimo ali'yana ali-maineafe nagaila hu falu fala ke'nia huteho.

13 Lufusi'a kanale'ya huno Yisasina akave nemalea kanoene ita'amo'enena nagaila hu falu fala ke'nia hunateho. Lufusina ita'amo'a ita'nimo kana huno naha'nemaeyane.

14 Asinakalitusi'ma Falegoni'ma Hemisi'ma Patolopasi'ma Hemasi'ma amakai'enema tokae'ya mainaya nafu'naganagamina nagaila hu falu fala ke'nia humateho.

15 Filologusi'ene Yulia'ene Neleusi'ene asa'amo'a Olipasi'ene amakai'ene mainaya Yisasi anaga'ene nagaila hu falu fala ke'nia humateho.

16 Anumaya Koti anaga'mogatama nehuna kava hutama tamahaote tamahaote muki'a tafu-taganagamina tamayana amamitama ali falu fala humateho. Muki'a kumate maine'ya Yisasi anaga'mo'ya "Mainafio?" hu'ya hu falu fala hulamatae.

Nago'a vaya'mo'ya Yisasi anaga'mogami amu'nopiti ali'ya aye fako humainae.

17 Muki'a nafu'naganagatama tamakesa alisua kea haviho. Nago'a vaya'mo'ya emaine'ya tamahapai-mainoa kemona amakave'no hute'ya ne'atagae'ya tamakaya mono kema havigahe alitaluma nehaya yapi melifako hisaya kema nehaya vaya'mogamifena ka'yetama mainetama ani kema nehaya vaya'mogamina tamakave'no humateho.

18 Ani vaya'mo'ya Anumaya Kalaisi ali'yafena amakesa ohavi'ya amakai'ami age hama'ye hisaya yafeke'ya akave malesaya amakesa nehae. Hagalama-haisifa ke hu'ya masave amake ne'ai'ya amaipafi ayegegage'ya kanale amakesama nohaviya vea'nea ayemavataga hu'ya ali'haviya humategahae.

19 Tamakaya Yisasi'ma hulatenea yafena havitama tamakupi maletama atafa hulinaya kea muki'a vea'mo'ya ago havimainaya yafena havite'na tusi'a muse nehue. Kanale au'ava yamo aepa'a havilama hutama nago'a kefo yamofe tamakesa ohavisae hu'nahe nehue.

20 Anumaya Koti'a, taipa falu hisia yamona aepa'agino, aupa kanafi Satanina taiyafinaga ayeno tatapegahie. Yisasi'a Anumayatimona kayone yama'amo'a tamakayaene hanesie hu'na nehue.

Nago'a vea'mo'ya avo kae'ya "Felugae." hu'ya Lomu veafe hu falu fala hune'amatae.

21 Nagai'ene ali'ya ne'alia kanoa, Timoti'a, huno falu fala hulamate. Ani'a hu'ya Lusiusi'ma Yesoni'ma Sosipata'ma nagai'ni Isaleli

nofi nafu'naga'ya “Mainafio?” hu'ya hu falu fala hulamatae.

²² Nagaya Tetiusi'na Polo avayafiti ke ali'na mani avona kae'na Anumayamo agile “Felugae.” hu'na hu falu fala hunelamatoe.

²³⁻²⁴ Kaiyusi'a “Felugae.” huno hu falu fala hunelamate. Noma'afina kanale'ya huno ya-gainatege'na mainoge'ya Yisasi anaga'mo'ya Anumayamo kema havisaya yafena agai nopina melitalu humainae. Elasatusi'a ani kuma'alate Kamanimo kusi kanoene Kavotusi'a tafu-tagana'ene “Felugae.” hu'ana hu falu fala hunelamata'e.

Tagaya Anumaya Koti agi alisaga hisune.

²⁵⁻²⁶ Anumaya Koti agia tusiya huta alisaga higetao. Yisasi'ma hulatenea kanale mono kema hu-hale'na nelamamua keleti Anumaya Koti'a hetitama tokiya waitama maisaya tokiya tamami-gahie. Mani kea hagoteno aya'aya kanagefa falakino haneanagino menia Anumaya Koti'a ago alino falote humalene. Anumaya Koti'a maige maige nehia kanomo'a mage huno humaine “Mani kea hufalote hiho.” huno humainea ke amaune vaya'mo'ya kae-malenaya kefiti “Muki'a alu nofi vea'mogamina hamapaisage'ya havite'ya amakupi male'ya amametiti hu'ya nagaila nahaisia kava hisae.” huno humaineane.

²⁷ Anumaya Koti'a nagoke'mo muki'a kanale havi havi'ya'ami hanea veala amakase-mainea kano maineafe Yisasi Kalaisi'a hulateneafene

huta agola muki¹a kanafina agia alisaga hisune.
Tamage.
Ke¹nia male ha¹no hie.
Nagai¹ni nagia Polo¹nae.

**Anumayamo'a Haegafa Alino
Hagelafilatenea Kea
The New Testament in the Kanite Language of Papua
New Guinea
Nupela Testamen long tokples Kanite long Niugini**

copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

PDF generated using Haiola and XeLaTeX on 18 Apr 2025 from source files dated 31 Aug 2023

55807fd5-1005-5405-89da-5533a7950c65